

四庫全書

經部

欽定四庫全書

經部
坊記集傳卷二

詳校官監察御史臣沈孫璉

給事中臣溫常綬覆勘

總校官編修臣倉聖脉

校對官編修臣錢樾

謄錄監生臣康傑

欽定四庫全書

坊記集傳卷二

微諫章第十六

明 黃道周 撰

子云從命不愆微諫不倦勞而不怨可謂孝矣詩云孝子不匱

孝之與忠一也孝不違親也不違君此治以王者也
孝不陷其親也不陷其君此治以天者也春秋以天
治臣子亦以天治君父然終春秋之世未有子諫其
父者也臣諫其君則有之至於不愆不倦不怨則亦

鮮詩曰匪言不能胡斯畏忌夫以畏忌施於君父則方未諫而忿心從之忿而倦倦而怨臣子之勞匱則自是始也

莊公十九年巴人伐楚楚子禦之大敗於津還鬻拳弗納遂伐黃敗黃師於踰陵還及湫有疾夏六月庚申卒鬻拳葬諸夕室亦自殺也而葬於經皇經皇者冢之闕閭也初鬻拳諫楚子楚子弗從臨之以兵懼而從之鬻拳曰吾懼君以兵罪莫大焉遂自刎也楚人以為大閭謂之太伯使其後掌之是以拒王於門沒又殉於經皇也如鬻拳者可謂不忿不倦不怨矣夫鬻拳強諫也懼君以兵忿孰如焉而謂之不忿何也鬻拳之以兵蓋欲自殺也古之自殺而諫者史魚之於衛靈公是也史魚死而鬻拳不死死者以為良史不死者以為大閭故史魚鬻拳皆可以不匱也然則鄭莊公何以不諫其母曰臣有所得於君子有所

不得
於母

僖公五年春晉侯殺其世子申生

左氏曰晉獻公寵驪姬將殺太子以君命申生曰
君夢齊姜必速祠而歸福申生許諾乃祭於曲沃歸
福於絳公田乃寘鵠於胙公至召申生獻公祭之地
墳試之物斃申生恐而出公殺其傅杜原款申生奔
新城杜傅使圉告申生曰疑也不才不能訓導以至
於死小心獨介不敢行也是以言至而無所訟之吾
聞君子不去情不反讒讒行身死猶有令名焉死不
遷情彊也守情說父孝也殺身以成志仁也死不忘
君敬也孺子勉之或謂申生曰非子之罪何不去乎
申生曰不可去而罪釋必歸於君是惡君也韋父之
惡而笑諸侯吾將誰入吾聞之仁不惡君知不重
因勇不逃死吾將伏以俟命驪姬見申生而哭之曰有

父忍之況國人乎申生乃經於新城方申生之未死也或謂申生曰子辭君必辨焉太子曰君非姬氏居不安食不飽我辭姬必有罪君老矣吾又不樂是則杜原款之教也為人師傅不能免人於難又不能自免也而相示以辨言為諱夫有豺狼其父之心乎子壽不諫其父而從役以死則猶之素厲也詩曰相彼投兔尚或先之行有死人尚或瑾之君子秉心維其忍之是杜原款里克之過也能諫而又能死者其惟富辰乎

僖公二十四年夏狄伐鄭

左氏曰鄭之入滑也滑人聽命師還又即衛鄭人伐滑王請滑不聽又執王人王怒將以狄伐鄭富辰諫曰不可臣聞之太上以德撫民其次親親以相及也昔周公弔二叔之不咸故封建親戚以藩屏周管蔡

邴霍魯衛毛聃邴雍曹滕畢原鄆郈文之昭也邴晉
應韓武之穆也凡蔣邢茅胙祭周公之胤也召穆公
思周德之不類故糾合宗族於成周而作詩曰棠棣
之華鄂不韡韡凡今之人莫如兄弟其四章曰兄弟
閔于牆外禦其侮如是則兄弟小怨不廢懿親鄭在
天子凡弟也鄭武莊有大勲勞於平桓凡我周之東
遷晉鄭是依子頽之亂又鄭之繇定今以小怨棄之
母乃不可乎章怨外利不義棄親即翟不祥以怨報
德不仁王不可以棄之不聽遂以翟伐鄭取櫟王德
翟人將以其女為后富辰又諫曰不可臣聞之曰報
者倦矣施者未厭狄固貪惏王又啓之女德無極婦
怨無終翟必為患王又弗聽及翟后立適於甘昭公
王黜翟后翟遂攻周王出及坎獸翟敗周師獲周公
忌父原伯毛伯殺譚伯富辰曰昔吾驟諫王不從以
及此難若我不出王其以我為慙乎乃率其屬死之
富辰可以不死也而以為不死無所致其勞故雖死

不怨者富辰之諫是也富辰可謂不匱矣

文公十八年冬莒弑其君庶其

左氏曰莒太子僕弑紀公以其寶來奔宣公使僕人以書命季天子曰夫莒太子不憚以吾故殺其君而以其寶來其愛我甚矣為我予之邑今日必授無逆命矣里革遇之而更其書曰夫莒太子弑其君而竊其寶來不識固窮又求自適為我流之於夷今日必通無逆命矣明日有司復命公語之僕人以里革對公執之曰違君命者女亦聞之乎對曰臣以死奮筆奚啻其聞之也臣聞之曰毀則者為賊掩賊者為賊竊寶者為軌用軌之財為姦使君為臧姦者不可不去也臣違君命者亦不可不殺也公曰寡人實貪非子之罪也乃舍之及夏宣公濫於泗淵里革斷其罟而棄之曰古者大寒降土蟄發水虞於是乎講畋留取

名魚登川禽而嘗之寢廟行諸國人助宣氣也鳥獸
孕水蟲成獸虞於是乎禁罝羅絜魚鼈以為夏犒助
生阜也鳥獸成水蟲孕水虞於是乎禁罝罾設罝鄂
以實廟庖畜功用也且夫山不槎蘗澤不伐天魚禁
鯢鮪獸長麋麇鳥翼鸛卵蟲舍蜺蜚蕃庶物也古之
訓也今魚方別孕不教魚長又行網罟貪無藝也公
聞之曰吾過而里革匡我不亦善乎是良罟也俾我
得法有司藏之使吾毋忘諗師存侍曰藏罟不如其
里革於側之不忘也里革則猶之諷貪者也徑而多
致夫以天子為舜功者不攘里革之翰以匱天子者
乎

齊景公田於沛還坐於遄臺晏子侍子猶馳而造焉
公曰唯據與我和夫晏子對曰據亦同也焉得和公
曰和與同異乎對曰異和如和羹焉水火醯醢鹽梅
以烹魚肉燔之以薪宰夫和之齊之以味濟其不及

以洩其過君子食之以平其心君臣亦然君所謂可而有否焉臣獻其否以成其可君所謂否而有可焉臣獻其可以替其否是以政平而不平民無爭心詩曰亦有和羹既戒既平酸醎無言時靡有爭先王之濟五味和五聲以平其心成其政也聲亦如味一氣二體三類四物五聲六律七音八風九歌以相成也清濁大小短長疾徐哀樂剛柔遲速高下出入周疏以相濟也君子聽之以平其心心平德和故詩曰德音不瑕今據不然君所謂可據亦曰可君所謂否據亦曰否若以水濟水誰能食之若琴瑟之專一誰能聽之同之不可也若是故諫有五而晏子皆用之近市之譏屢傾諷也不誅祝史正也擇射鵰者反也以禮靖國直也真鳩之樂從也

晏子之諫可謂不匱者矣

魏戊之為掇陽也掇陽人有獄魏戊不能斷以獄上其大宗以女樂賂魏獻子將受之魏戊謂閭浸女寬

曰主以不賄聞於諸侯若受是賂賄莫甚焉吾子必
諫皆許諾退朝待於庭饋入召之比置三歎獻子曰
吾聞唯食忘憂吾子置食之間三歎何也同辭而對
曰或賜二小人酒不夕食食之始至恐其不足是以
數中置自咎曰豈將軍食之而有不足是以再歎及
饋之畢願以小人之腹為君子之心屬厭而已獻子
乃辭梗陽人孝子不匱魏戊有
焉朋友攸攝閭閻沒女寬有焉

范宣與蘇大夫爭田久而無成宣子欲攻之問於伯
華伯華辭以軍事問於孫林父林父辭以旅人問於
張老張老辭如伯華問於祁奚祁奚辭以公族問於
籍偃籍偃辭如張老問於叔魚叔魚曰吾為子殘之
叔向聞之見宣子曰盍訪之訾拓乎訾拓直而博且
吾子之家老也於是司馬侯祁午皆諫未聽乃問於
訾拓訾拓曰昔隰叔子違周難於晉國生子與為理
以正於朝朝無姦官為司空以正於國國無敗績世

及武子佐文襄為諸侯諸侯無二心及為卿以輔成
景軍無敗政及為成師居太傅端刑法輯訓典國無
姦民後之人可則是以受隨范及文子成晉荆之盟
豐凡弟之國使無有間隙是以受鄆櫟今吾子嗣位
朝無姦行國無邪民賴三子之功饗其祿位既無事
矣而非蘇將何治為宣子悅乃益蘇田而與之平訾
祐死宣子歎之以為無所朝夕也故春秋無諫子若
富辰里革晏子可謂不匱之臣矣自晏子而外其唯
師曠
乎

襄公十四年夏四月己未衛侯衎出奔齊

師曠倚於晉侯晉侯曰衛人出其君不亦甚乎對曰
或者其君實甚良君將賞善而刑淫養民如子蓋之
如天容之如地民奉其君愛之如父母仰之如日月
敬如神明畏如雷霆其可出乎夫君神之至而民之

望也。若困民之主，匿神之祀，百姓絕望，望社稷無主，將安用之？弗去何為？天生民而立之，君使司牧之，勿使失性。有君而為之貳，使師保之勿使過度。是故天子有公，諸侯有卿，卿置側室，大夫有貳宗，士有朋友，庶人工商，皂隸圉牧皆有親暱，以相輔佐也。善則賞之，過則匡之，患則救之，失則革之。自王以下，各有父兄子弟，補察其政，史為書，瞽為詩，工誦箴，諫大夫規誨士，傳言，庶人謗，商旅于市，百工獻藝。故夏書曰：道人以木鐸徇于路，官師相規，工執藝事以諫。正月孟春，於是乎有之，諫失常也。天之愛民甚矣，豈其使一人肆於民上，以從其欲而棄天地之性，必不然矣。師曠之論，則有所本也。何本之有？於里革之論晉厲公也。然言諫者，至於師曠出君之論而匱矣。惜乎共世子之不遇師曠也。

睦族章第十七

子云睦於父母之黨可謂孝矣故君子因睦以合族詩云此令兄弟綽綽有裕不令兄弟交相為瘡

隱公元年冬公子益師卒

二年夏無駭帥師入極

四年秋翬帥師會宋公陳侯蔡人衛人伐鄭

五年冬十有二月辛巳公子彊卒

八年冬十有二月無駭卒

九年春挾卒

猶是公族也而進退異辭何也穀梁子曰惡者不日而有公子與不公子焉公羊子曰無駭始滅者也翬與弑者也或曰公子益師公子驅先公子也已命者也無駭挾未命者也隱不爵命大夫則亦非先大夫矣非先大夫故不舉族左氏曰無駭卒羽父請謚與族公問族於衆仲衆仲對曰天子建德因生以賜姓胙之土而命之氏諸侯以字為謚因為族官有世功則有官族邑亦如之公乃命以字為展氏夫是知公之不睦族也公自以為未君也諸公族不與爵命九年之中沒兩公子兩公族而皆未有爵命也共守組豆而不得俯僂之錫則其思去者衆矣且以氏錫僖伯則不得不以氏錫無駭與挾不以氏錫無駭與挾則亦不得以爵與翬無駭與翬猶之驂服也鞅緩則皆判矣故無駭者幸而先隕也不幸而不先隕則入極之志必與鍾巫發軔故鍾巫者入極之餘烈也聖人未有無故而疑其詞者也

隱公十年夏六月壬戌公敗宋師於菅辛未取郕辛巳取防

秋宋人蔡人衛人伐戴鄭伯伐取之

左氏曰庚午鄭師入郕辛未歸于我庚辰鄭伯入防辛巳歸于我君子謂鄭莊公於是乎有禮以王命討不庭不貪其土以勞王爵正也是則未為正也周鄭皆姬也郕者文王之昭也穀梁子曰極亦姬姓也戴亦姬姓也戴之姬姓何也曰陳留所謂戴國也出於姬姬姓四十國極戴處二焉

冬十月壬午齊人鄭人入郕

左氏曰討違王命也郕亦文王之昭也蓋自入極以來四滅同姓五月之間取大昭之二族以為鄭人取

之而魯鄭同罪且是伐戴之師春秋歸於鄭伯取郕取防則未嘗歸之鄭伯也入郕之惡分於齊鄭入極之惡則不分於齊鄭也是皆我始之以為齊晉之開塞自是而後晉獻興基首滅虞虢文公創伯先執曹衛文武之昭穆自相斬刈則實於隱公始也故坊記者記壞防之所繇始也棠棣之詩曰是究是圖亶其然乎角弓之詩曰爾之教矣民胥傲矣其魯隱公之謂夫

桓公二年夏四月取郕大鼎于宋戊申納于太廟

左氏曰宋督已殺孔父而弑殤公召公子馮於鄭而立之以親鄭以郕大鼎賂我齊陳鄭皆有賂焉夏四月我取大鼎於宋戊申納於太廟臧哀伯所謂韋賂者也記者之意則似以為憫郕也郕恃同姓弱而見侵故納鼎於宋以資其援今既入其國又取其鼎則非宋鄭滅郕而魯實滅郕也魯實滅郕春秋之所責

也

桓公三年六月公會杞侯于郕

杞者亡國之後也郕者兄弟之親也會杞于郕則是縣郕也縣郕則謂郕不若紀也隱桓之間無令兄弟其是之謂與

莊公三年春王正月溺會齊師伐衛

左氏曰疾之也穀梁子曰溺者何也公子溺也其不稱公子何也惡其會仇讐而伐同姓故貶而名之也夫亦謂其黨朔與朔與黔牟則皆兄弟也而朔無王黔牟有王朔無公子黔牟有公子故存春之王而去溺之公子是亦一道於睦族之說則未有礙也

莊公八年夏師及齊師圍邾邾降于齊師

公羊以為盛也盛亦同姓也成非同姓也左氏不言同姓而直以為邾則是不諱同姓也左氏之義諱此而見彼若季天子之納莒僕不見之於傳而見於國語是也

閔公元年春王正月齊人救邢

邢者周公之後也邢有狄難而魯有內患魯不能救而齊救之則猶之魯救之也然則魯無內患能救邢乎曰不能何知其不能也諸侯不相遺俘莊公六年魯受衛俘諸侯異姓分媵同姓分患齊侯遷衛而魯人不能具其難豕以其受衛俘知其不能救衛以其不能救衛知其不能救邢也然則魯不若曹乎聶北之會曹宋同功而魯無有曰魯之視曹猶之極戴成部也可滅則滅之矣不可滅則聽霸主之從頌故邾

復見於經邾之復見於經
誼不許魯與杞之縣邾也

僖公二十有五年春王正月丙午衛侯燬滅邢

是禮至所披殺國子也邢嘗與狄伐衛則邢亦狄也
邢狄而衛滅之文公所哀痛而致志也邢不滅於衛
亦滅於狄然卒不幸不滅於狄而滅於衛蓋桓管不
死則未有此也詩曰人之云亡心之憂矣管仲之謂
也

僖公二十有八年春晉侯侵曹晉侯伐衛

左氏曰晉侯將伐曹假道于衛衛人弗許還自南河
濟侵曹伐衛正月戊申取五鹿二月晉卻敳卒原軫
將中軍胥臣佐下軍晉侯齊侯盟于斂孟衛侯請盟
晉人弗許衛侯欲與楚國人不欲故出其君以說于

晉衛侯出居于襄牛正月戊申則有其日也二月盟于欽孟則有其月也衛侯出居于襄牛則有其地也然則春秋不書而書兩晉侯何也曰有霸無王此非一日之故矣非一日之故何也晉侯出於翟將入齊行過五鹿乞食於野人野人舉塊以與之子犯曰天賜也天事必象十有二年必獲此土於是十二年矣及離齊入楚行過衛衛有邢翟之虞不能禮焉寧莊子言於衛侯曰康叔天之昭也唐叔武之穆也周之大功在武天昨將在武族荀姬未絕守天聚者必武族也武族唯晉實昌晉肅公子實德天昨有德晉之守祀必公子也衛侯弗聽自衛過曹曹共公亦不禮焉聞其辭骨欲觀其狀謀其將浴設微薄而觀之僂負羈之妻言於負羈曰吾觀晉公子賢人也其從者皆國相也以相一人必得晉國得晉國而討無禮曹其首誅也乃餽殽置璧焉負羈謂曹伯曰臣聞之愛親明賢政之幹也禮賓矜窮禮之宗也先君叔振出

自文王晉祖唐叔出自武王二王之嗣世不廢親今
君棄之是不愛親也晉公子生十七年而亡卿材三
人從之可謂賢矣而君蔑之是不明賢也晉公子之
亡不可不憐也比之賓客不可不禮也守天之聚將
施於宜玉帛酒食猶糞土也愛糞土以毀三常無乃
不可乎曹伯不聽於是晉侯伐之然則春秋不許晉
侯乎曰王者在上亦有不睦之刑不睦無禮伐之是
也然而已邈已邈則猶之不睦也若不得併日而伐
之然穀梁子曰再稱晉侯忌也忌之為言意也急也
然則鄭亦不禮而未伐之何也曰疑楚也曰首止之
會王將以鄭和楚鄭於是逃盟而疑之何也曰自洮
而後五會矣晉未執牛耳焉鄭伯相王蘭又在晉是
以遼緩之然則鄭之後伐公子蘭
之為也不然難乎其三書晉侯也

僖公三十年秋晉人秦人圍鄭

是晉侯秦伯也而人之何也曰不專為怨也故散之
為其貳楚也而討之則晉侯不任受過不任受過而
又不是以服楚則散矣秦伯聽燭之武戍鄭而還則
是秦貳也秦以壹出而以貳終之將為秦諱故并諱
晉焉曰猶之未嘗討鄭云耳

晉侯之初過鄭也鄭文公亦不禮之叔詹諫曰臣聞
之親有天子用前訓禮兄弟資窮困天所福也今晉公
子有三胙焉天將啓之同姓不婚惡不殖也狐氏出
自唐叔狐姬伯行之子也實生重耳成而雋才離違
而得所久約而無釁一也同出九人唯重耳在離外
之患而晉國不靖二也晉侯曰載其怨外內棄之重
耳日載其德狐趙謀之三也吾先君武公與晉文侯
勦力一心股肱周室夾輔平王平王勞而德之賜之
盟質曰世相起也若親有天獲三胙者可謂大天若
用前訓文侯之功武公之業可謂前訓若禮兄弟晉

鄭之親王之遺命可謂兄弟若資窮困還軫諸侯可謂窮困棄此四者以徼天祇無乃不可乎

文公十有二年春王正月邾伯來奔

溺伐衛齊救邢燬滅邢皆書王正月故知春秋之厚邢邾也厚邢邾則邢邾可以不亡然則是邾太子也而爵之何也曰國喪無君太子可以爵矣故爵之然則滕杞皆侯也而子之邾伯初喪實子也而伯之春秋獲喪以爵小國是毋乃濫乎曰是丈之昭也無故而失國王不能爵則魯爵之魯不能爵則春秋爵之魯不得請之王春秋得以請之天然則魯以侯禮迎邾子而左氏以為非禮何也魯不能存邾則亦不能存邾又冒禮焉不如從春秋而請之天故邾伯之爵春秋之所代天也

成公四年夏公如晉秋公至自晉

左氏傳曰夏公如晉晉侯見公不敬季文子曰晉侯必不免詩曰敬之敬之天維顯思命不易哉晉侯之命在諸侯矣可不敬乎秋公至自晉欲叛晉而求成於楚季文子曰不可晉雖無道未可叛也大臣睦而適於我諸侯聽焉未可以貳史佚之志曰非我族類其心必異楚雖大非吾族也其肯字我乎公乃止故富辰竊速僖負羈鄭叔詹季文子此五臣者猶不忘睦族之誼也

襄公二十有九年夏杞子來盟

左氏曰晉侯使司馬齊來治杞田弗盡歸也悼夫人愠謂女齊受貨公告叔侯叔侯曰虞虢焦滑霍揚韓魏皆姬姓也晉是以大武獻以下兼國多矣誰得治之杞夏餘也而即東夷魯周公之後也而睦於晉以杞封魯猶可而何有焉魯之於晉也職貢不乏玩好時至公卿大夫相繼於朝如是可矣何必瘠魯以肥

把故女叔齊亦有睦族之誼焉然以為
職貢玩好也棠棣之詩未之思焉耳

定公六年春二月公侵鄭公至自侵鄭

左氏曰公侵鄭取匡為晉討鄭之伐胥靡也往不假
道於衛及還陽虎使季孟自南門入出自東門舍於
豚澤衛侯怒使彌子瑕追之公叔丈子老矣輦而如
公曰尤人而效之非禮也昭公之難君將以文之舒
鼎成之昭兆定之鑿鑑苟可以納之擇用一焉公子
與二三臣之乎諸侯苟憂之將以為之質此羣臣之
所聞也今將以小忿蒙舊德無乃不可乎太姒之子
唯周公康叔為相睦也而效小人以棄之不亦誣乎
天將多陽虎之罪以斃之君姑待之乃
止故如衛公叔發可謂綽綽有裕者矣

敬辨章第十八

子云於父之執可以乘其車不可以衣其衣君子以廣孝也子云小人皆能養其親君子不敬何以辨子云父子不同位以厚敬也書云厥辟不辟忝厥祖

夫是其為衛事發與為衛事發何也君子舉其所見以倣其所不見者祖孫君臣父子之義一也而又廣之若衛事之類是也

定公十四年秋衛世子蒯聵出奔宋

哀公二年晉趙鞅帥師納衛世子蒯聵于戚

三年春齊國夏衛石曼姑帥師圍戚

公羊子曰齊國夏曷為與石曼姑帥師圍戚霸討也此其為霸討奈何曼姑受命乎靈公而立輒以曼姑之義為固可以拒之也輒者蒯賁之子也蒯賁為無道靈公逐蒯賁而立輒然則輒可以立乎曰可其可奈何不以父命辭王父命以王父命辭父命是父之行乎子也不以家事辭王事以王事辭家事是上之行乎下也然則公羊子為衛君也穀梁子曰此衛事也其先國夏何也子不圍父也不繫戚于衛者子不有父也然則穀梁子不為衛君也何以斷之斷之以伯夷叔齊之讓中子也然而公子郢不可何也斷以子父不姦之義也然則蒯賁之書世子春秋與蒯賁乎曰與世子也非與蒯賁也蒯賁懷父車而衛輒懷也

桓公十有一年突歸于鄭

鄭忽出奔衛

是兄弟也而有父子焉鄭忽之乘父車與突之衣父衣皆非父所命也猶躋輒之無命也見父則不見衣與車見衣與車則不見父突忽所見皆鄭也不見莊公莊公所見諸寵也猶不見子故忽以鄭為車突以鄭為衣不得曰忽突以莊公為父莊公以忽突為子也然則忽之復稱世子何也曰等而視之忽與突也久而察之忽則世子也突則伯也從鄭人之所見而已矣

桓公十五年五月鄭伯突出奔蔡

鄭世子忽復歸于鄭

秋九月鄭伯突入于櫟

舍車而衣其衣猶謂之鄭伯舍衣而乘其車猶謂之鄭世子春秋於此何取乎使突可伯則初歸鄭而已伯使忽可世子則初奔衛而已世子又遲於四五年之後而後伯世子之使人疑鄭伯之於世子也曰春秋之意不欲以鄭定伯與世子也欲使天定之天定之不可而後與鄭焉國無兩主君不同位必欲盡去其伯與世子則又難乎世之為諸侯者也始與之使少有辨焉而已矣然則鄭突之與衛朔同辭何也曰均非天之所定也均非天之所定則當以國定之而子儀黔牟不表於春秋何也曰春秋不許羣公子之自為國也然則春秋許子糾與曰子糾亦非世子也子糾之稱子小白之稱齊猶子糾之乘車而小白之衣衣也視其所終為之見袂軾焉耳

僖公五年夏公及齊侯宋公陳侯衛侯鄭伯許男曹

伯會王世子于首止

秋八月諸侯盟于首止

穀梁傳曰無中事而復舉諸侯何也尊王世子而不敢與盟也尊則不敢與盟何也盟者不相信也不敢以不信加之尊者桓諸侯也不能朝天子是不臣也王世子子也玁然受諸侯之尊已而立乎其位是不子也桓不臣王世子不子而善之何也是則變之正也天子微諸侯不享觀桓桓控大國扶小國統諸侯不能朝天子又不敢致天王尊王世子於首止所以尊天王之命也世子受諸侯之尊已而天王尊矣故世子受之可也越哉穀梁子之為禮也王室未定世嫡疑貳桓公率諸侯會王世子於首止以內折姦萌外壹衆志故會非朝也王曰朝世子曰會王世子之出會諸侯非典也諸侯之進會王世子各致其志焉耳而

穀梁子疑有擁止之事是猶以葵丘之會桓公指笏而蒞諸侯者也故乘其車不衣其衣父子不同位其辨亦取諸此也

僖公七年秋七月公會齊侯宋公陳世子款鄭世子

華盟于甯母

左氏曰盟于甯母謀鄭故也鄭伯使世子華聽命于會言于齊侯曰洩氏孔氏子人氏三族實違君命若君去之以為成我以鄭為內臣君亦無所不利焉齊侯將許之管仲曰君以禮與信屬諸侯而以姦終之無乃不可乎子父不奸之謂禮守命共時之為信違此二者姦莫大焉公曰諸侯有討於鄭未捷今者有釁從之不亦可乎對曰君若綏之以德加之以訓辭帥諸侯以討鄭鄭將覆亡之不暇豈敢不懼若總其

罪人以臨之鄭有辭矣何懼且夫合諸侯以崇德也會而列姦何以示後嗣夫子華既為太子而求介于大國以弱其國亦必不免鄭有叔詹堵叔師叔三良為政未可圖也齊侯辭焉子華以是得罪於鄭故管仲知所謂敬辨者矣子華既乘父車以會諸侯又奸父命以亂鄭國霸主所宜討也然且不討故晉文之學出於齊桓而齊桓特正也然則世子會諸侯不為父子同位乎曰其別之也下於諸侯一等其為父命也不然不會

八年春王正月公會王人齊侯宋公衛侯許男曹伯陳世子款盟于洮鄭伯乞盟

穀梁子曰王人之先諸侯何也貴王命也朝服雖敝必加于上弁冕雖舊必加于首周室雖衰必先諸侯

然則乞盟者子華乎抑鄭伯乎公羊子以為子華在會鄭伯請與子華蒞命而又在會鄭伯不出而又書鄭伯則是子父殺亂也左氏曰襄王定位而後發喪蓋當莊僖之時子父殺亂始於王室而鄭衛從之故鄭衛王風詩相次者是春秋之義也

僖公九年夏公會宰周公齊侯宋子衛侯鄭伯許男曹伯于葵丘

穀梁子曰天子之宰通于四海宋其稱子何也未葬之辭也禮柩在堂上孤無外事今背殯而出會以宋子為無哀矣然則管仲不辭宋襄公何也曰猶魯之不辭曹射姑也宋桓公七與齊桓之盟使子為終厥志又董之以王事宋子謂是金革也越禮而與之不亦已亟乎曰幾於齊烈也而有侈心

冬晉里克殺其君之子奚齊

十年春晉里克弑其君卓

奚齊則曰君之子卓則曰君奚齊則曰殺卓則曰弑何也曰春秋惡夫相殺之無已也物近而不相得則凶或害之奚齊近於申生卓子不近於申生奚齊或害卓子不或害均之非世子也而無以正里克之罪故以卓荀息正之是春秋之辨位也然則春秋與荀息乎曰殺荀息與里克同辭里克之於荀息敵也有君之子有君之臣非夫世子世臣也皆不免於死而里克之譎不若荀息之正也

僖公二十有八年五月癸丑公會晉侯齊侯宋公蔡

侯鄭伯衛子莒子盟于踐土

衛子者誰叔武也叔武非世子又無君喪而子之何也曰以喪禮處之也晉立以為君罪不至於降爵上假天王下資通國書侯則無等也書名則沒其實故以喪禮處之若以君父奔楚之為哀痛也降服致敵以聽天子之命是不已同位乎曰霸王為之天王下勞春秋正辭春秋不正辭則必曰衛侯叔武是國有二主也然則剽衍之有二主何也曰一出一入不在王會則以國為辭以國為辭無霸之義也然則天王狩於河陽何義也曰父坐子立乘其車不衣其衣之義也

僖公二十九年夏六月會王人晉人宋人齊人陳人蔡人秦人盟于翟泉

左氏曰夏公會王子虎晉狐偃宋公孫固齊國歸父陳轅濤塗秦小子憇盟於翟泉尋踐土之盟且謀伐

鄭也在禮卿不會公侯會伯子男可也是為諱公者發也公會王子虎以及諸侯之卿公與王子未亂位也而春秋猶諱之是春秋之辨也敬而養志謂公雖執牛耳而無所當於盟主也然且以是著於閭宮

文公七年秋八月公會諸侯晉大夫盟于扈

左氏曰齊侯宋公衛侯陳侯鄭伯許男曹伯會晉趙盾盟于扈晉侯立故也公後至故不書所會凡會諸侯不書所會後也後至不書其國避不敏也夫扈之會非正也以七國之諸侯特會晉之大夫則是以君與趙盾也以君與趙盾則公可以不會故略之非直公略之七國之公侯亦宜略之何也是皆父執也然則公子遂會晉趙盾盟于衡雍可謂養志乎曰公子遂何養志之有春秋別之各車其車焉耳

十有六年春季孫行父會齊侯于陽穀齊侯弗及盟

六月戊辰公子遂及齊侯盟于鄆丘

季孫行父則不盟公子遂則盟何義也曰襄仲賂也賂則可以同位乎曰衰世之政也自垂隴而然垂隴之盟公孫敖始會陳鄭自是諸侯同會趙盾于扈于新城而齊侯曰父執也其勝霸之餘乎而卒以賂亂故晉之多取賂於諸侯亦宗國之教也

昭公二十有二年夏六月王室亂

王室之亂不於是始也而於是焉書亂者蓋自是無霸矣王子猛與王子朝并繼而書名子朝又以其偏詞燭於諸侯故子父之辨位不可不審也王室四亂皆始於子父之不辨位也而鄭衛齊晉效之桓王子子充莊王子頽惠王子帶景王子朝是也齊晉中亂而獲霸功鄭衛中亂而不至於亡是皆有桓文之力焉

至於晉平齊景而衰矣春秋尊文王而哀周公則於是始也以王子旬之微也而書曰天王居於翟泉天王入於成周以昭公之親也而一曰公在乾侯再曰公在乾侯謂桓文之功仲尼不道則亦未之有也夫以首止河陽亦猶有亂位之事乎去首止河陽則亦無以廣孝無以厚敬故春秋者以廣孝敬為義不以正名法為義也猶屈軼之不為瑞草也

敬老章第十九

子云父母在不稱老言孝不言慈閨門之內戲而不歎君子以此坊民民猶薄於孝而厚於慈子云長民者朝

廷敬老則民作孝

舊凡二節

是為曹伯之使其子射姑也身在負茲而輕越其子射姑冀天國之援而不辭其父施伯之所怪也是為詹括之欲立佞夫也除服而見志在朝柄不感而願大聲聞於外是公子愆期之所欲殺也是為晉人之食絳老人也不鄙其度言而遺佚是嫌是為鄭人之用燭之武也秦人之用蹇叔也詢是黃髮皓灌與謀是為周襄王之錫桓公也曰叔父耄老勿使下拜是為楚子之泣於乾谿也曰天下有愛子如予者乎又曰予殺人子多矣能無及乎然則小人養親何謂也謂夫許止之以親嘗藥者也

追孝章第十九

子云祭祀之有尸也宗廟之有主也示民有事也修宗廟敬祀事教民追孝也以此坊民民猶忘其親

是其為文公與文公慈惠懈于有位公孫敖叔孫得臣公子遂季孫行父為政政縣四卿祭則繇公四卿者未嘗為尸而嘗為公也

文公二年二月丁丑作僖公主

於是過葬十月矣公羊子曰主者曷用虞主用桑練主用栗用栗者藏主也作僖公主何譏譏不時也其不時奈何欲久喪而後不能也穀梁子曰立主桑主於虞吉主於練作僖公主譏其後也作主壞廟有時日於練焉壞廟壞廟之道易檐可也改塗可也穀梁子所言壞廟者何也謂壞祧廟以更新廟則必率緩其事曠其時日易檐改塗則自五月而練已濟矣然則十月而後藏主其有躋僖公之心乎其有躋僖公之心何也諸侯五世去廟而祧自隱而僖五世矣惠公在位幾五十年隱公九會諸侯幾霸中夏疑於不

祧焉魯人之意欲下閔公也而有所不敢故遷延於孝惠之祧廟而穀梁子以為易檐改塗焉可者則將在孝惠與將在閔廟與曰必在孝惠也閔為禰廟如之何以禰廟為祖廟也

八月丁卯大事于太廟躋僖公

大事于太廟蓋請之周公也秋嘗者魯祭之重者也僖公之頌曰秋而載嘗夏而禘衡白牡騂剛犧尊將將白牡者周公之牲騂剛者魯公之牲也魯用禘祭以躋僖公使閔公俛焉絀於其下蓋自魯公以來十五世矣僖公穆也而使為昭周公宜亦未之許也而仲尼獨存其詩者何也僖公佐兩霸主再朝天王其薨也天王為之會葬錫命史克作頌仲尼採之則是可以大事矣然而難乎其為尸也禮廟立主祭立尸祖為之主則孫為之尸越禰而祖則將使公子遂叔孫得臣輩為之尸與將使仲孫蔑公孫歸生輩為之

尸與故主則易為主也尸則難為尸也事則易為事也禮則難為禮也公羊子曰大事者何大禘也大禘者何合祭也其合祭奈何毀廟之主陳於太祖未毀廟之主皆合升於太祖五年而再殷祭躋者何升也何言升僖公譏何譏爾逆祀也謂其先禘而後祖也是猶夫乘父之車而衣其衣者也

文公六年閏月不告月猶朝于廟

前此則皆告朔也春秋不書閏月二百四十二年得八十一閏而春秋取二焉春秋之法歸餘於終則猶冬十二月也又公六年書閏月不書十二月則猶夏正月也凡閏月不得中氣中氣移於後月之朔則節氣在閏月之中一歲之贏十日九分積而漸退七閏之章中於十一前後閏起也而春秋皆歸餘於冬春秋皆歸餘於冬則文公元年誤閏三月哀公十二年冬猶流火者何也曰是傳也非經也經哀公五

年冬叔還如齊閏月葬齊景公則是終閏也有螽之月蓋以一閏則火西伏矣故春秋十八閏舉其五者皆為歸餘戰國之襲舛則有所本也然則閏可不告朔與曰閏生於氣朔生於月朔之有閏日月星氣之合也始以之始中以之中終以之終朔之有閏猶祀之有尸廟之有主也朝廟而不告朔猶灌鬯而不獻尸祫祭而不迎主也故文公之過文而過非質而過也易於變禮而不達其本亦猶夫公穀之謂天無是月喪事不數道可以已者也然則春秋不曰告朔而曰告月何也日月者民事之所從生也民受精於日而成形於月月歲十二交隱其資始而著其資生至於閏而著矣閏者王正之門也非是則無以成歲故二典之所致慎也

十有三年秋世室屋壞

公羊子曰世室者何魯公之廟也周公稱太廟魯公稱世室羣公稱宮魯公之廟曷為謂之世室世世不毀也周公何以稱太廟于魯封魯公以為周公也周公拜乎前魯公拜乎後曰生以養周公死以為周公主然則周公之魯乎曰不之魯封魯公以為周公主周公之不之魯欲天下之一于周也魯祭周公何以為牲周公用白牡魯公用騂剛羣公不毛魯祭周公何以為盛周公盛魯公燾羣公廩世室屋壞何以書譏何譏譏爾久不修也穀梁子曰宗廟之事君親割夫人親春敬之至也為社稷之主而先君之廟壞極稱之志不敬也然則煬宮武宮可以不壞乎曰煬宮武宮可以不壞則桓宮僖宮可以不災曰無以為主亦無以為尸則無以為事矣然非所論於太室之道也

十有六年夏五月公四不視朔

四不視朔則是王正視朔也王正視朔則猶知有王也春陽穀之會公不肯會齊侯齊侯亦不會行父行父以疾歸公公亦以疾自與也公之以疾自與何也歸惡於齊侯也齊侯弑其君舍而執其君母及我大夫一載之內再侵吾疆是而與之會則辱吾君不與之會則虔劉我西鄙姑委之行父仲遂行父必曰仲遂也能公於是疾自與也然則公不視朔是乎曰四不視朔則已過矣魯秉禮之國也其或有他難則猶以祀事自免也而棄先生之朔廢朝廟之典使後世襲之以為故常是則文公之過也然則齊討奈何曰天下之可已亂者惟禮也以商人之逆寄生不榮慎吾封疆正辭以折之縱不能討天下之與我者不少矣而孤以疾自與卒之行賄竟無所伸其說則是行父子遂之罪也然則居者有疾行者有事其告月之禮如何曰行者借廟而朝之居者宗祝致其辭

食義章第二十

子云歌則用祭器故君子不以菲廢禮不以美沒禮故
食禮主人親饋則客祭主人不親饋則客不祭故君子
苟無禮雖美不食焉易曰東隣殺牛不如西隣之禴祭
實受其福詩云既醉以酒既飽以德以此示民民猶爭
利而忘義

文公二年三月乙巳及晉處父盟

誰及之公及之公及之而不
書所以辨位也亦以辨器

三年冬公如晉十有二月己巳公及晉侯盟

左氏曰處父之盟晉侯懼其無禮於公也請改盟公如晉及晉侯盟晉侯饗公賦著者莪莊叔以公降拜曰小國受命於大國敢不慎儀君貺之以大禮何樂如之抑小國之樂大國之惠也晉侯降辭登成拜公賦嘉樂是不廢禮亦不沒禮也善哉晉襄公之悔也猶有桓文之遺焉至於靈平魯幾不得於諸侯

四年衛侯使甯俞來聘

左氏曰衛甯武子來聘公與之宴為賦湛露及彤弓不辭又不答賦使行人私焉對曰臣以為肄業及之也昔諸侯朝正於王王宴享之於是乎賦湛露則天子當陽諸侯用命也諸侯敵王所愾而獻其功王於是乎賜之彤弓一彤矢百琫弓矢千以覺報宴今陪臣來繼舊好君辱貺之其敢干大禮以自取戾如甯

武子可謂知禮矣穆叔之聘晉則於此防也

成公二年晉侯使鞏朔獻齊捷於周春秋不書為非禮也王弗見使單襄公辭焉曰蠻夷戎狄不式王命淫湏蔑常王命伐之則有獻捷王親受而勞之所以懲不敬勸有功也兄弟甥舅侵敗王略王命伐之告事而已不厭其功所以敬親暱禁淫慝也今叔父克遂有功于齊而不使命卿鎮撫王室鞏伯實來未有職司於王室又奸先王之禮余雖欲與鞏伯其敢廢舊典以忝叔父夫齊甥舅之國也而太師之後也寧不亦淫從其欲以怒叔父抑豈不可諫誨士莊伯不能對王使委於三事禮之如侯伯克敵使大夫告慶之禮降於卿禮一等王又宴鞏朔而私賄之使相者告曰非禮也勿籍周室雖衰故典猶在詩曰雖無老成人尚有典刑蓋謂此也

晉侯使隨會聘於周定王饗之殺烝原公相禮范宣子私於原公曰吾聞王堂之禮無毀折今此何禮也原公以告王召士季曰子弗聞乎禘郊之事則有全烝王公立飫則有房烝親戚宴饗則有殺烝今女非它也叔父實使士季來修舊德以獎王室唯是先王之宴禮欲以貽女余一人敢設飫禘焉以干舊職而亂前好且唯夫戎翟則有體薦其體氣不治若鳥獸焉通來班貢不俟馨香嘉味故坐諸門外使舌人體委與之女今王室之一二兄弟以時相見將蘇協典禮以示民訓則無亦擇其柔嘉選其馨香潔其酒醴品其百籩酬幣宴貨以示容好胡有孑然其效戎翟也武子不敢對退歸乃譏三代之典禮修執秩以為晉法甚矣隨武子之似孟獻子也罪不廢禮美不沒禮蓋王者所醉飽天下也

成公十二年冬晉卻至如楚聘且涖盟楚子饗之子反相為地室而縣焉卻至將登金奏作於下驚而走

出子反曰日云暮矣寡君需矣吾子其入也郤至曰君不忘先君之好施及下臣貺之以大禮重之以備樂如天之福兩君相見何以代此下臣不敢子反曰如天之福兩君相見無亦唯是一矢以相加遺焉用樂郤至曰若讓之以一矢既之大者何福之為世之治也諸侯間於天子之事則相朝也於是乎有享宴之禮享以訓共儉宴以示慈惠恭儉以行禮慈惠以布政政以禮成民是以息百官承事朝而不夕此公侯之所扞城其民也故詩曰赳赳武夫公侯干城及其亂也諸侯貪冒侵欲不忌爭尋常以盡其民略其武夫以為已腹心爪牙故詩曰赳赳武夫公侯腹心天下有道則公侯能為民干城而制其腹心亂則反之吾子之言亂之道也不可為法然吾子主也至不敢從郤至可謂無禮雖美不食者矣

襄公四年夏叔孫豹如晉

左氏曰穆叔如晉報知武子之聘也晉侯享之金奏肆夏之三不拜工歌大王之三久不拜歌鹿鳴之三三拜韓獻子使行人子員問之對曰三夏天子所以享元侯也使臣弗敢與聞文王兩君相見之樂也臣不敢及鹿鳴君所以嘉寡君也敢不拜嘉四牡君所以勞使臣也皇皇者華君教使臣曰必諮於周臣獲五善焉敢不重拜穆叔則學於寧武子者也武子婉而摯穆叔詳而晰是皆近於飽德者也然則楚子之歌大明韓起之賦我將皆非禮也而韓子無譏何也曰上民畏威節取焉耳不愈於與處父交盟者乎詩曰雖無德與女式歌且舞

教敬教睦章第二十一

子云七日戒三日齋承一人焉以為尸過之者趨走以

教敬也醴酒在室醕酒在堂澄酒在下示民不淫也尸飲三衆賓飲一示民有上下也因其酒肉聚其宗族以教民睦也故堂上觀乎室堂下觀乎上詩云禮儀卒度笑語卒獲

夫為春秋者亦有侑尸之義與曰無之無之則所云教敬教睦者何也曰為盟會之事也盟會之有主也神明之拊也微而王人尊而侯伯貴而列卿賤而大夫相示以敬相示以睦故三王之道有所不廢也若盟主之與公尸是也

莊公十有三年春齊侯宋人陳人蔡人邾人會于北

杏

是衣裳之始會也宋陳蔡邾首尊齊侯以為盟主衛
遂未之從也然而衛歸猛獲則從之矣誅不從而首
滅遂夫為尸者亦有澄酒之心乎

冬公會齊侯盟于柯

公羊子曰何以不日易也其易奈何桓之盟不日其
會不致信之也其不日何以始乎此莊公將會乎桓
曹子進曰君之意何如莊公曰寡人之生則不若死
矣曹子曰然則君請當其君臣請當其臣莊公曰諾
于是會乎柯莊公升壇曹子手劍而從之管子進曰
君何求乎曹子曰城壞壓境君不圖與管子曰然則
君將何求曹子曰願請汶陽之田管子曰君許諾
桓公曰諾曹子請盟桓公下與之盟已盟曹子操劍

而去之要盟可犯而桓公不欺曹子可讎而桓公不
怨桓公之信著於天下自柯之盟始焉然而曹沫之
能得於柯犂彌之能不可得於夾谷桓公之信下盟
於匹夫定公之信不動而著於天下則教敬教睦之
道異也

定公十年春王三月及齊平

夏公會齊侯于夾谷

夾谷之會則亦不日也左氏傳曰夾谷之會孔丘相
犂彌言于齊侯曰孔丘知禮而無勇使萊人以兵劫
魯侯必得志焉齊侯從之孔丘以公退曰士兵之兩
君合好而裔夷之俘以兵亂之非齊君所以命諸侯
也裔不謀夏夷不亂華俘不干盟兵不偪好於神為
不祥於德為愆義君必不然齊侯聞之遽辟之將盟

齊人加於載書曰齊師出竟而不以甲車三百乘從我者有如此盟孔丘使茲無還揖對曰而不反我汶陽之田吾以共命者亦如之於是齊人來歸鄆謹龜陰之田夫以諸侯盟會神人聽睹非朝伊夕而使匹夫裔夷昧眎其間禮儀笑語委之秕稗雖信猶無所獲申豐曰宗廟之中未施敬於民而民敬之其夫子之謂乎

莊公十有九年秋公子結媵陳人之婦于鄆遂及齊

侯宋公盟

桓公之盟也不致日不致諸侯不歃血欲從者從之夫有如是之盟者乎則猶之不盟也是猶之不訛士不擇日而祭也亦猶之不立阼不設位而迎尸也柯之會以其易而易之至於鄆而極矣夫猶以彭生子

糾之事以失魯為恥者乎而使大夫會于霸主猶因
酒肉而聚宗族也西鄙之伐則繇此矣謂其道之不
足教敬也亦以
長勺長其驕心

二十三年公如齊觀社

曹蒯諫曰不可夫禮所以正民也先王制諸侯五年
四王一朝也終則講於會以正班爵之義帥長幼
之序訓上下之節其間無繇荒怠夫齊棄太公之法
而觀民於社君為是舉而往觀之非故業也天子祀
上帝諸侯會之受命焉諸侯祀先王先公卿大夫佐
之受事焉臣不聞諸侯之相會祀也祀又不法君舉
必書書而不法後嗣何觀公不聰遂如齊故曰堂上
觀乎室堂下觀乎上以是尸女使人無所奔走易曰
閭觀女貞亦可醜
也其是之謂與

二十有七年春公會杞伯姬於洮

左氏曰非事也天子非展義不巡狩諸侯非民事不舉卿非君命不越竟是亦穀梁所謂尸女也承一人焉使人無所奔走其有酒肉之心乎然則公子結之媵陳人季子友之葬原仲亦君命與曰皆君命也非君命不著於經

閔公二年夏五月乙酉吉禘于莊公

公羊子曰其言吉何言吉者未可以吉也曷為未可以吉未三年也曷為未三年三年之喪實以二十五月其言于莊公未可以稱宮廟也曷為未可以稱宮廟在三年之中矣吉禘于莊公何以書譏何譏爾譏始不三年也然則三年矣有莊公之宮廟亦可以禘乎曰禘之賜為周公也非為魯公魯公從周公周公

不從魯公也閼宮之頌曰周公之孫莊公之子龍旂
承祀六轡耳耳春秋匪懈享祀不忒龍旂六轡天子
之禮也魯之子孫不用天子之禮則龍旂六轡不出
廟門迎尸送尸無以彰天王之賜亦無以彰周公之
德也故魯之羣公皆用之羣公亦從周公者也魯以
禘嘗合祀於太廟從周公而用禮樂天下所不非仲
尼不以為非也隱公考仲子之宮初獻六羽桓公不
以為疑仲尼亦不以為疑也仲子之宮用六羽則桓
宮亦必用六羽桓宮丹刻而用八羽則必以八羽而
躋仲子之宮故魯之用大禮不自僖公始也其酌用
侯禮自隱公始也春秋之賢隱公以為足與於禮樂
魯人之尊桓公以為能張天子之賜也然則郊祀始
於僖公與曰閼宮者吳斯所作也魯人郊禘祖后稷
而宗周公其詩曰皇皇后帝皇祖后稷享以騂犧是
饗是宜降福既多周公皇祖亦其福女公羊子之不
譏禘而譏短喪是得於禮之正也然則周公后稷有

尸與曰郊無尸而廟有尸時祭有尸而祫祭無尸然則三桓之堂亦有大禮與曰奚取之也子言之堂上觀乎室堂下觀乎上然則魯公世室亦用大禮與曰駢則者魯公之牲也后稷亦用是牲羣公不毛瑩公從周公而不從魯公從太廟而不從世室是世室之所以壞也然而皆用八佾不八佾則魯公亦無以祀周公故曰禘廟六羽魯人之所不取也

僖公五年夏公及齊侯宋公陳侯衛侯鄭伯許男曹伯會王世子于首止

是不日月之何也世子之出會諸侯諸侯之專會太子皆非禮也國危不事冢宰君老不事世子惠王將立子帶諸侯相率而朝王與宰周公正太子之位則子帶坐替無所用勤於首止也用勤於首止則是挾

世子以命天王猶未有廟而先為尸也未有廟而先為尸則何以為主襄王之閱喪而定位則自此始也曹射姑之朝春秋書曰曹伯使其世子射姑來朝春秋不書曹伯之使射姑則射姑歸而曹伯死射姑無以正其始魯人亦無以明其令也惠王不命世子而世子私會諸侯世子歸三年而王崩王崩而閱其喪惠王即有以正其終首止亦無以正其始也然則桓之會皆不日何也曰不致也首止之會何可不致也白從頌之以待天下之諸侯然則洮之會王人葵丘之會宰周公孰為尸與曰王命為尸宰王人拊者也其非王命則桓公為尸然則是非世子與曰世子而繫之王則猶之王命也無王命無以號召於天下

八年秋七月禘于太廟用致夫人

公羊子曰用者何用者不宜用者也致者何致者不宜致者也禘用致夫人非禮也夫人何以不稱姜氏

貶曷為貶譏以妾為妻也其言以妾為妻何蓋曾于齊媵女之先至者也然則安知其非哀姜也曰哀姜之葬七年矣哀之則必致之是已致者也安知其非成風也曰成風後此尚三十年君立於阼階夫人出於東房君薦爵夫人薦豆君薨母不入廟無所致之是未致者也然則何知其為聲姜也曰致之又明年公及夫人姜氏會齊侯于陽穀則是聲姜也詩曰令妻壽母宜大夫庶士邦國是有然則何知其妻也曰前此則未有致也大夫不納幣公不親迎然則葵丘之會致嚴於嫡妾而公與桓公首犯之何也曰楚女未至齊姜則自以為嫡也曰姜不勝芊霸主定之固其所矣然則左氏之以為哀姜何也曰疑於莊公之未有夫人也宗廟之禮君立尸夫人不立尸君致詳夫人致略故聲子聲姜之事左氏疑於君夫人也

卒事章第二十二

子云賓禮每進以讓喪禮每加以遠浴於中雷飯於牖下小歛於戶內大歛於阼殯於客位祖於庭葬於墓所以示遠也殷人弔於壙周人弔於家示民不偯也子云死民之卒事也吾從周以此坊民諸侯猶有薨而不葬者

子云升自客階受弔於賓位教民追孝也未沒喪不稱君示民不爭也故魯春秋記晉喪曰殺其君之子奚齊及弒其君卓以此坊民子猶有弒其父者

是為喪葬之禮與曰非為喪葬之禮也為賊不得則
薨不書葬幼君稱子幼子稱君為人臣子不敢有遇
賊不討遇幼主不君使天子翫其法諸侯委其禮者
也然則是一事與二事與曰猶之一事也春秋賊不
得則不書葬內亂不成禮不書葬踰年之子稱君未
殯之君稱子以禮立坊而託之殯弔喪葬則猶之一
事也故慎終追遠不偕不爭是禮春秋之通教也無
春秋則無以治禮春秋諸侯見弑者二十有三其得
討賊而書葬者三四公而已其幼君十數而得書君
者卓子而已卓子不足為君奚齊不足為君之子而
春秋皆嚴其辭大其事以子歸奚齊以君歸卓子示
父命之不可違君名之不可亂雖申生杜原款起而
不能奪也故坊記之記則必有取之也然則喪禮每
加以遠升自客階受弔於賓位者何也言諸侯居喪
未殯不當阼之禮也然則其為子般子赤及昭公之
喪與子般子赤之喪何也子般殯莊公之喪三月矣

出於黨氏公子慶父使圉人犇殺之慶父將以自與也季友不可乃立閔公於是莊公七月乃葬閔公立二年慶父又使卜齮賊公於武闡慶父身弑二君而莫之敢討也閔公又不得葬春秋不以慶父治慶父而以里克治慶父里克殺一子弑一君猶之亂命也而魯以治命亂之使莊公夷於晉獻哀姜匹於驪姬是仲尼所不忍書也子赤者何文公之子也文公薨已葬九月矣子赤幾乎成君者也公子遂私於敬嬴欲立宣公遂殺子赤及子赤之弟視夫使晉史書之必曰公子遂弑其君赤及其君之弟視而春秋稱曰子卒沒視不書春秋不以里克治仲遂而以慶父治仲遂慶父之弑一君殺一子猶有季友逐之奚斯哭之仲遂之弑一君殺一子及一大夫惠伯遂無有逐之哭之者及其死也猶為輟舞於廟是仲尼之所深痛也深痛之而不書之何也列國之史已書之矣猶晉之書里克也夫非董狐者亦曰君奚齊君卓子卒

焉耳而魯人已書之乘檣机亦已書之故春秋不以
慶父仲遂治慶父仲遂而以里克治慶父仲遂也昭
公之喪何也三十二年十二月昭公既薨于乾侯殯
不得入殯不得入則定公不得即位弔者無所弔葬
者無所葬贈者無所贈六月癸亥乃入是六越月矣
又六日戊辰公乃即位又踰月乃葬諸子曰踰年不
言即位正棺於兩楹之間然後即位遲之以年正之
以日屬也而又有禮焉諸子則以是為禮也仲尼則
以是為變也謂其不得浴於中雷飯於牖下小斂於
戶內大斂於阼殯於客位祖於庭葬於墓弔於壙反弔
於家升於客階受弔於賓位也為人子不得此十一於
者而正棺於兩楹之間則猶與仇讐而講旅獻者矣
故夫子私歎之又與諸弟子論道之乃退而筆之春
秋故奚齊卓子春秋之所發端也夫魯之春秋當時
則亦如此矣

然則事有偕於此者乎曰有之春秋所以開卷也魯
隱公生不書即位不書葬其生不書即位則必讓
桓以為喪主升客階受弔於賓位反哭祔廟皆從幼
主以附棺於兩楹之外沒不書葬則不得浴於中雷
飯於牖下小歛於戶內大歛於阼殯於客位祖於庭
葬於墓虞於壙反弔於家故其即位無以正始薨葬
無以正終也無以正始無以正終則春秋之書元年
春王正月何也曰以春秋之義則可以正始可以正
終也其可以正始正終何也隱出於聲子桓出於仲
子以仲子為繼孟子者而聲子之公先於仲子隱公
不忍以嫡媵之分傷惠公之志故以即位之義讓其
弟以仲子之貴請於天子天子之賜惠公仲子則隱
公之請隱公之義也而隱公又不自立子然則隱公
未有子與曰寯舍之既有死者羽父之克無所加毒
則是不自為子也不自為子而桓公以謀羽父以謀
故春秋謂桓公羽父亦有里克之義也然則里克非

正者與曰以里克之正也而猶不免於晉史之書奈何以羽父之正而免於魯春秋之書之也故春王之正仲尼欲以正天下而先於魯正之也穀梁子曰隱十年無正隱不自正也元年有正所以正隱也夫正天下非為正隱也

隱公四年春王二月戊申衛州吁弑其君完

五年夏四月葬衛桓公

誰葬之衛子晉也是十四月乃葬然則州吁之殺在四年九月又五月乃葬何也蓋州吁死乃立宣公始就西階受弔行事又五月乃葬緩矣而未備也是誰為之曰石碯也石碯之子厚實擁州吁州吁未能和其民石碯勸之入陳以求王命乃使陳人執而殺之然則州吁不出於濮陳人又不殺州吁則如何曰國

人不和州吁多怨是亦不能久有衛也而石碯惡夫厚之備從必速殺之藉手於陳惜乎魯之無石碯也然則時有季友能為石碯乎曰不能共仲弑一子一君而不能討也幾乎不免然則石碯之殺其子季友之醜其兄亦有差等與曰石碯有謀而季友失序父兄之過皆可以諫也而不諫討重於子牙則威殫於慶父矣故曰惜乎魯之無石碯也然則隱公無子羽父累上討羽父亦可及於桓公乎曰歸獄於羽父亦可正位於桓公

桓公二年春王正月戊申宋督弑其君與夷及其大夫孔父

三月公會齊侯陳侯鄭伯于稷以成宋亂

宋亂平則可以書葬矣而不書葬何也凡亂賊之興皆自謂正也羽父曰惠公歿則位宜與執華督曰穆公歿則位宜與馮聽其言則正也而行之則僭故仁義之名非姦人所得借也不得之王命則得之君命不得之君命則春秋當命之春秋天也舉國所共為命也而葦小桀聚以為之命若葦帥師會宋陳蔡衛之伐鄭是也故春秋書曰公會齊侯陳侯鄭伯于稷以成宋亂宋亂之成華督柄宋而羽父柄魯故謂羽父弑宋殤公未有不可也

桓公十有二年秋八月壬辰陳侯躍卒

是次不葬者也其次不葬何也曰是有林杅白之難焉且亦厲公也嫌於陳佗之為厲公故不葬厲公是以無陳佗為累者乎或曰蔡人之欲立出也厲公無以正其禮

十有五年三月乙未天王崩

莊公三年五月葬桓王

是亦有王子克之難焉公穀皆曰改葬意之也以莊王之慙其父亦不至於七年而隱公之薨於是二十年矣則亦已矣無有溝而合於公宮者矣是春秋之所深痛也然則惠公亦改葬與曰隱公元年惠方練期何為其改葬也

八年冬十有一月癸未齊無知弑其君諸兒

九年春齊人殺無知

秋七月丁酉葬齊襄公

誰葬之桓公小白也誰殺無知雍廩也不與雍廩以討賊而使國共討之公羊子曰春秋君弑賊不討不書葬以為無臣子也子沈子曰君弑臣不討賊非臣也子不復讐非子也葬者生者之事也春秋君弑賊不討不書葬以為不繫乎臣子也故殺無知則襄公可以葬矣且大桓公以葬襄公所以教為人子而宏父業者也

十有二年秋八月甲午宋萬弑其君捷及其大夫仇牧

冬十月宋萬出奔陳

賂陳人乃殺宋萬是非正討也故不書葬宋閔公不難乎其為桓公乎曰桓公之志不在於葬閔公也

僖公九年春王正月丁丑宋公御說卒

夏公會宰周公齊侯宋子衛侯鄭伯許男曹伯于葵

丘

是宋子也不葬其父而以衰經溷於衣裳是猶之與
弑者乃使其父不以葬著於春秋曰是且葬矣曰雖
葬非宋襄公之志也故為父而
葬葬以禮為子而葬葬以志

九月甲子晉侯詭諸卒

晉獻公之不書葬亂也無晉之亂而不書葬則是與
亂同事也與亂同事則春秋亦以亂治之矣獻公啟
駟四君二十年其幸免
於弑猶孽鳥之逃羿也

十有四年冬蔡侯貜卒

是不與蔡也不與蔡而亦不與宋故楚宋之爭霸皆亂也貜與甲午亦皆春秋之所治也穀梁子曰諸侯時卒惡之也惡其從楚也夫春秋則亦有惡乎

十有七年冬十有二月乙亥齊侯小白卒

十有八年秋八月丁亥葬齊桓公

危矣乎其幾為陳厲公與晉獻公也七日而殯九月乃葬誰葬之曰孝公昭也孝公與於弑乎曰不與於弑易牙立無虧而昭已奔宋故以葬與孝公昭

二十有三年夏五月庚寅宋公茲父卒

宋襄公之不葬謂其不葬宋桓公也桓公不書葬則不得書襄公之葬襄公無葬父之心則成公無葬父之事成公緊下者也夫亦責襄公而已矣故公羊子謂之盈諱也然則春秋諱襄公乎曰春秋公天下何諱之有然則其為桓公諱何也曰痛周公不得不痛隱公也痛隱公而諱桓公故霸者之與王交治也

冬十一月杞子卒

不葬謂其用夷禮也用夷禮者何蓋猶長其夏肆焉

二十有四年冬晉侯夷吾卒

惠公之不葬亂也懷公不得葬惠公春秋所不討也

二十有八年陳侯款卒

陳蔡一也陳侯初如會退而薨如之何不葬曰陳子甫五月而與於溫夫有宋襄公之心乎為天子仲大義而使人舍親之殯以就於盟好其為人子者亦舍豈杖襄裳而從之則是與亂同事也故與亂同事者春秋之所治也若葵丘之有宋子溫之有陳子是也皆以盟主而遺其親

三十二年夏四月己丑鄭伯捷卒

公子瑕之亂也楚人將納公子瑕覆於周氏之汪乃殺子瑕是非與亂同事也然猶不得時葬則亦春秋之所閔也故春秋不惡其人而惡其事不閔其人而閔其時

三十三年十有二月公至自齊

乙巳公薨于小寢

文公元年夏四月丁巳葬我君僖公

是不為緩而左氏以為緩何也謂緩作主非是緩於葬也

七年夏四月宋公王臣卒

宋人殺其大夫

昭公居喪未殯而去羣公子穆襄之族率國以攻公宮六卿和公室乃即位而葬於是羣公子不在喪位則猶之不成喪也是為禮討也故有討禮討事討人討時

八年秋八月戊申天王崩

九年二月辛丑葬襄王

是以閏則亦八月以桓文之功功
襄王故襄王之喪春秋之所貴也

十有三年夏五月壬午陳侯朔卒

邾子貜卒

是皆內多故焉不然則已懈或曰邾子知命遷繹而
民不怨立纘且而晉不敢亂夫是邾子也嘗用鄆子
於次睢之社是可以不
葬如之何其知命也

十有四年夏五月乙亥齊侯潘卒

九月齊公子商人弑其君舍

舍之賊未可得也則自夏歷秋亦不可殯齊桓之烈
再世而三弑其君則其內訓薄而本計失也或曰哀

魯也魯不能治齊又從服焉故謂之哀魯也

十有六年冬十有一月宋人弑其君杵臼

十有八年夏五月戊戌齊人弑其君商人

宋弑杵臼焚於孟諸齊弑商人納諸竹中是可以不葬也而使爲舍鍾巫與之同例是聖人之所痛也然則杵臼之賊壓於祖母商人之賊壓於兄同斷乎曰同亂而已

冬十月子卒

宮弑其君庶其

子赤之賊未可得也庶其之賊則固在魯矣逸而之齊是行父之過也行父之於趙盾未弑乎而猶以舜

功自居故庶其之
於行父同斷也

宣公二年秋九月乙丑晉趙盾弑其君夷臯

四年夏六月乙酉鄭公子歸生弑其君夷

是兩夷生也以穿歸獄於趙盾猶以宋歸獄於歸生
也是皆不足以葬猶羽父共仲之未死也十年鄭改
葬幽公則猶
之不葬也

二年冬十月乙亥天王崩

三年正月葬匡王

亦猶之桓王也舉緩則已緩舉促則已促
衰王不治政令霸主不治禮樂

九年九月辛酉晉侯黑臀卒于扈

冬十月癸酉衛侯鄭卒

兩成公之不葬謂其遠魯也亦其為禮不足以葬

十年夏五月癸巳陳夏徵舒弑其君平國

十有二年春葬陳靈公

是亦可以廢日月也是蓋二十月矣則不知其為何月與衛桓公齊襄公內討者也陳靈公外討者也外討過於大祥而猶得書葬公羊子曰討此賊者非臣子也何以書葬君子辭也楚已討之矣臣子雖欲討之無所討也以楚之討怨臣子之討惜乎其不以哀姜之討為襄仲之討也

十有八年秋甲戌楚子旅卒

楚莊不書卒則難乎其為賢君也楚莊書葬則難乎其稱公也生可以子正其實沒不可以公矯其名正其名者隱其實雖在吳越則亦猶此矣

成公十有四年冬秦伯卒

秦無亂焉而不葬何也秦桓公既敗令狐之盟召狄與楚欲道以伐晉於是晉使呂相絕秦然則春秋惡惡止於其身肆怨死者之罪晉絕秦而春秋絕之何也曰春秋本魯者也魯秦霸主之令不賻不禭則春秋亦不得賻禭之矣然而秦穆之親賻禭而卒葬不及秦穆何也曰是所謂惻惻而栗者也

十有五年夏六月宋公固卒

秋八月庚辰葬宋共公

何其速也穀梁子曰葬共姬不可不葬共公姬從公者也公非從姬者也且共姬未卒是為蕩澤之亂也桓族將有事而先葬共公猶突忽將有事而先葬莊公也故既亂之生必先自壞禮始也其朕兆先見而衆莫之察若鄭之葬莊公宋之葬共公皆以諸侯而降大夫之禮者也

十六年夏四月辛未滕子卒

是何例也猶隱公八年夏六月辛亥宿男卒也生細而沒大以細則有其日月以大則去其名或曰從其訃也而爵則不訃甚矣國之無人也以文王之昭闕於禮法而卒與宿男伍故禮者弘人之道也爵者非弘人之道也

十七年十二月邾子貍且卒

是猶之
蘧蔭也

十八年春王正月晉殺其大夫胥童

庚申晉弑其君州蒲

是葬于翼東門之外以車一乘是亦賊也可以不討
乎曰舉臣而弑其君則罪在臣舉國而弑其君則罪
在君罪在君則其不葬者在君罪在臣則其不葬者
在臣然則春秋與樂書與曰何為其與樂書也然則
春秋不與悼公與曰何為其不與悼公也晉悼公之
再霸十五年又八年而樂氏滅於是仲尼始生天覆
樂氏厲公改葬則州蒲之賊亦可以不討也故齊以
桓公葬諸兒晉以悼公葬州蒲繼事之大大於殺賊

襄公元年九月辛酉天王崩

二年春王正月葬簡王

是五月也是以天王而降諸侯之禮天
王而降諸侯甚於諸侯而降大夫者也

六月庚辰鄭伯踰卒

鄭成公何以不葬猶之蔡穆公也蔡侯肸鄭伯踰皆
以從楚不葬則是春秋不怒死者也曰春秋怒死者
而官命未改則彼自取之成公卒不一月而晉人謀
鄭不五月而城虎牢則是鄭不得息育也不得息育
則何書葬之有

七年冬十有二月鄭伯髡頑如會未見諸侯丙戌卒

于鄆陳侯逃歸

八年夏葬鄭僖公

鄭僖公之卒弑也誰弑之鄭子駟弑之子駟未討而書葬何也曰志正也其志正何也楚圍陳晉會諸侯于鄆將以救陳陳侯逃歸以自救也鄭伯不逃歸以從諸侯諸大夫弑之則為楚者也春秋葬之則為王者也然則何以不書弑而又書葬也書弑而不討賊則不得書葬書卒而又不書葬則無以異於鄭成公父子異志而春秋異義故春秋權也量物之輕重而為之衡者也

十有二年秋九月吳子乘卒

十有三年秋九月庚辰楚子審卒

其不葬已著之矣或曰
或不日楚詳而吳略也

十有五年冬十有一月癸亥晉侯周卒

十有六年春王正月葬晉悼公

是方三月也悼公三駕卒以服楚於蕭魚自桓大而後未有盛於悼公者而卒葬三月以霸主冒大夫之禮亦春秋之所畏也然則是猶之宋共公與共公之亂兆於蕩澤是其中行伯與中行伯急於得諸侯將執邾子莒子以許伐楚而廢公之遺言故功利者春秋所不貴也苟偃之急於操盟與蕩澤之急於得政皆亂也亂恆敗功功不勝亂則渙梁之會苟偃之罪府也然則邾莒無罪乎曰小國不幸當齊楚之衝行李餽遺何罪之有

十七年春王二月庚午邾子貜卒

微之為齊而侵我無所異於莒黎比者也春秋無微夫謂其不成喪也不然何以葬杞孝公又何以葬邾公悼

二十有五年夏五月乙亥齊崔杼弑其君光

是莊公也葬於士孫之里四翼不蹕下車七乘不以兵甲是有十人焉不足以死亦不足以葬有重丘之盟則崔氏之賊不可得也

三十年夏四月蔡世子般弑其君固

冬十月葬蔡景公

異之也春秋之異者獨此耳以為甚之也而同於許世子止是輕比之也以為臣不葬而子不可不葬也然則蔡靈公之見起於春秋何也曰是必有逸事焉以免於討

三十一年十有一月莒人弑其君密州

展與之立猶之莒僕也因亂而立亦不足以葬亦不足以弔謂其有幸君之心也

昭公元年冬十有一月己酉楚子麇卒

楚公子比出奔晉

是不書葬者亦無從問賊矣然則吳不書葬猶書曰閔弑吳子餘祭何也吳太伯之後也吳子卒魯人哭之先公之廟未為失也江漢之濱誰問之則亦問之公子比而已然則公子比非賊乎曰君弑而出奔晉

踰年而反反而弑
君何為其非賊也

八年夏四月辛丑陳侯溺卒

猶從其哀而葬之是春秋之恕也陳侯溺生而逃盟
死而縊是不足以葬矣而亦葬之惡夫楚之滅陳而
葬之也楚之僭王猶夏寢以盛矣故春秋哀明德之
後而惡僭亂之國非以獎陳正以攘楚也豈惟扶弱
謂哉抑強之

十三年夏四月楚公子比自晉歸于楚弑其君虔于

乾谿

楚公子棄疾殺公子比

春秋之不罪虔而罪比何也春秋貴討賊而賊逃死逃死而不討賊不討賊而又自為君則甚於賊者矣故鄭敖靈敖之賊皆歸於子比而棄疾無過焉是春秋之治也然則春秋畏彊禦而逸賊者與曰春秋惡人之相殺而無已也是季札子之志也

冬十月葬蔡靈公

靈公之不葬三十一月矣身弑其君而見誘於敵三年而後葬之穀梁子曰變之不葬有三失德不葬弑君不葬滅國不葬然且葬之不與楚滅且成諸侯之事也

十有四年八月莒子去疾卒

不葬
亂也

十有九年夏五月戊辰許世子止弑其君買

冬葬許悼公

弑而得葬則是賊得也許止之與莒展與同例乎曰同於蔡般同於蔡般則甚也是重比之也夫使春秋無傳則許止之與蔡般同誅者乎抑以蔡般誅許止抑以許止宥蔡般是春秋之所深隱也春秋不以子沒父不以父沒子於此則必有取之也

二十七年夏四月吳弑其君僚

將謂惡不討賊者乎謂惡尋殺者乎先事則惡不討賊後事則惡尋殺兩者所以綱紀也且使討賊與尋殺同例則後起者得也是猶非春秋之志也

三十二年十有二月己未公薨于乾侯

定公元年夏六月癸亥公之喪至自乾侯戊辰公即

位

秋七月癸巳葬我君昭公

喪至而即位即位而後葬葬而別於墓道之南
以是為去成康為未久也其去之久已遠矣

十三年冬薛弑其君比

謂惠公夷之不能討賊亦不能葬也以
為猶著於宿男焉而終君臣於春秋

哀公四年春王二月庚戌盜殺蔡侯申

盜者誰公孫翩也翩殺而書葬雖十月未緩也

十年三月戊戌齊侯陽生卒

齊之弑陽生以悅吳師非義也陽生弑荼而自立春秋已去其子而與其卒書其葬何也曰陽生實卒也而齊借其死以悅吳師使吳子三日哭于軍門之外然則春秋不惡吳子與曰春秋道其實也春秋以禮與吳不以禮與楚不以禮與吳楚而還與春秋若葬陳靈公蔡靈公之事是也春秋與楚討賊葬陳靈公不與楚滅國不葬蔡靈公故春秋之情見矣然則春秋而正於霸主易曰正大而天地之情見矣然則春秋以子弑父者有之乎曰未之見也莒弑庶其莒僕因之竊寶以殺季佗也歸獄於僕莒弑密州展輿因之竊國竊國之罪重於竊寶而春秋兩貫之則安知夫許止之為嘗藥與蔡般之為子甌與罪許止以為奔

齊而許止已歿蔡般以爲罪楚而楚之惡不及蔡
般之惡也故春秋所見以天下果未有此也何以見
之曰於誘蔡侯般見之也蔡侯般之罪大於夏徵舒
則申之執何爲其無鐘鼓也故春秋者天下之至恕
也然則襄丑之言不驗乎曰以
子弑父何十二年之有也

不貳章第二十三

子云孝以事君弟以事長示民不貳也故君子有君不
謀仕唯卜之日稱二君喪父三年喪君三年示民不疑
也父母在不敢有其身不敢私其財也示民有上下也
故天子四海之內無客禮莫敢為主焉故君適其臣升

自阼階即位於堂示民不敢有其室也父母在饋獻不及車馬示民不敢專也以此坊民民猶忘其親而貳其君

桓公十有八年秋天王殺周公黑肩王子克奔燕春秋不書何以不書也惡其似桓公者也天子之討能行於封內不能行於諸侯其壞法亂紀亦自天子始也自天子始如何初王子克有寵於桓王桓王將立之屬於周公黑肩辛伯諫曰並后匹嫡兩政耦國亂之本也周公弗從至是莊王立二年矣周公貳於王將立子儀子儀即克也辛伯聞之以告莊王王殺周公黑肩王子克出奔燕故為人臣者不可以貳為人弟者不可以貳黑肩有功於桓王而卒以戮死故羽父共仲仲遂行父之免於王法則幸也惜乎莊王不

敢討魯也而又
來錫桓公命

莊公十有九年秋王子頹伐王師不克出奔衛衛人
燕人入周立子頹是大事也而春秋不書何也春秋
將以天王正天下之諸侯而先為繩尺以正天王則
無以正天下之為諸侯者故繻葛之戰君子之所諱
也諱繻葛并子頹而諱之然後知諱魯之不得已也
謂其去成康猶未遠也臣不可以貳其君弟不可以
貳其兄

二十年夏天王出居于櫟是皆不書春秋不樂以天
正王不樂以王正天下初莊王嬖王姚生子頹子頹
有寵為國為之師及莊王崩僖王在位僅五年而惠
王立惠王稍侵先臣之田為國與諸臣失祿者奉叔頹
以攻王宮不克出奔溫蘇子以衛師燕師伐周立子
頹明年鄭伯和王室不克執燕仲父遂以王歸處于

櫟鄭伯入成周執寶器歸又明年鄭伯與虢公同伐
王城殺王叔類及五大夫是王叔也以莊王之寵不
貳於僖王而貳於惠王蓋其蘊貳再世矣魯不能討
而鄭厲公能討之故春秋之怨鄭厲公有以也夫然
則天王出居于櫟與鄭伯之入于櫟有異乎曰天王
入於廟升自阼階即位於堂百辟皆備諸侯朝夕饒
百執事禮也

禧公五年會王世子于首止乃書世子者誰太子鄭
也惠王不怵於子亢子類之既又寵惠后愛少子帶
欲廢太子而立之公會齊侯宋公陳侯衛侯鄭伯許
男曹伯以定太子王惠使周公召鄭伯曰吾撫女以
從楚輔之以晉無憂諸侯矣鄭伯懼逃歸於是諸侯
伐鄭又明年王崩諸侯盟于洮先定王位而後發喪
王子帶召伊洛之戎焚王城王討叔帶叔帶奔齊後
十年乃召而復之於是王崩王討亦皆不書所不書

者畏以王室間於內難關雎鵲巢之誼息則春王正月之義起春王正月之義息則律量繩尺皆無所從起也是春秋之所以恕也故謂春秋治嚴者過也

僖公二十四年冬天王出居于鄭

天王再出居矣於是乃書者何責魯也責魯者何首止之會齊桓桓實是在是圖王室定計於鮮子顏之既鄭厲焉依蓋未專告魯也於是宋襄沒矣重耳未入魯不急王難而卑蹈四年以待秦晉之師左氏傳曰隗氏之亂顏叔桃子奉叔帶以敗王師王出適鄭處於汜帶以隗氏處於溫王使來告難曰不穀不德得罪於母弟之寵子帶鄙在鄭地汜敢告叔父臧文仲對曰天子蒙塵於外敢不奔問官守王使簡師父告於晉左鄆父告於秦鄭伯與三大夫省眎官具於汜而後聽其私政禮也王新伐鄭鄭猶不敢缺於王禮魯

承王命而僂焉仰於秦晉使天子蒙塵四年於外向微重耳則周之為狄久矣魯以八百乘之國四應諸侯再盟衛莒南乞楚師東取齊穀入祀園宋夫非有貳心於王室何其從楚之驟也故曰責魯責魯者責其忘王室而有二心於楚也

宣公元年春王正月公即位

公子遂如齊逆女

夏季孫行父如齊

公會齊侯于平州

公子遂如齊

六月齊人取濟西田

記者之言其為宣公與宣公之貳於子赤一也私於襄仲二也謀君三也短喪四也喪娶五也獻濟西田六也不聞於天子而私請之諸侯七也襄仲殺子赤而立宣公哀姜大歸于齊宣公患齊之討也越喪而要於齊賂以濟西之田吉行而會於平州平州者齊泰山之西州也以為成子會則莫之討夫亦誰討之乎而徒喪其田詩曰錫之山川土田附庸夫猶是魯公之田也亦猶是周公之喪也以田賂齊如之何其以喪賂齊也故魯之有貳心者或謂宣公也

成公五年冬十一月己酉天王崩

十有二月己丑公會晉侯齊侯宋公衛侯鄭伯曹伯

邾子杞伯同盟于蟲牢

曰已貳矣去天子之喪方四十日也至者可不聞聞者可不至其至之而聞聞之而至者乎于是則亦有禮焉惜乎莫之講也

昭公四年夏楚子蔡侯陳侯鄭伯許男徐子滕子頓子胡子沈子小邾子宋世子佐淮夷會于申

左氏曰楚子合諸侯於申椒舉言於楚子曰臣聞諸侯無歸禮以為歸今君始得諸侯其慎禮矣霸之齊否在此會也夏啟有鈞臺之享商湯有景毫之命周武有孟津之誓成有岐陽之蒐康有鄴宮之朝穆有塗山之會齊桓有召陵之師晉文有踐土之盟君其何用宋向戌鄭公孫僑在諸侯之良也君其選焉王

曰吾用齊桓乃使問禮於左師與子產左師獻公合
侯之禮六子產獻伯子男會公之禮六王使楚椒舉
侍於後以規過卒事不規王問其故對曰禮吾未見
者有六焉又何以規宋太子佐後至使椒舉辭之弗
見徐子吳出也以爲貳焉執之楚子示諸侯侈椒舉
曰夫六王二公之事皆所以示諸侯禮也夏桀爲仍
之會有緡叛之商紂爲黎之蒐東夷叛之周幽爲太
室之盟戎狄叛之皆所以示諸侯汰也今君毋乃以
汰乎楚子弗聽甚矣楚子之貳也其
於六王二公猶之蒲宮執戈之智也

先事後祿章第二十四

子云禮之先幣帛也欲民之先事而後祿也先財而後
禮則民利無辭而行情則民爭故君子於有饋者弗能

見則不眎其饋易曰不耕穫不菑畲凶以此坊民民猶貴祿而賤行

文公九年春毛伯來求金

非禮也禮相見以贄聘問以幣以金次龜燕私之際也君子言不及利居不及玩好二霸之會也未嘗有賂毛伯求金而後諸侯大夫上下徵賂終春秋之世非賄不免故春秋所惡自叛逆而外唯賄而已詩曰或以其酒不以其漿韜韜珮祿不以其長言大國徵求小國之無所祈免也

文公十五年冬十有一月諸侯盟于扈

左氏曰晉侯宋公衛侯蔡侯鄭伯許男曹伯盟于扈尋新城之盟且謀伐齊也齊人賂晉侯故不克而還

于是有齊難公亦不會然公則可以不會也以齊之
伐魯也故謀伐齊以齊之納賂也而卻八國之師則
是以八國之師取賂於道也齊以賂免魯必以不賂
駝齊將取償於魯而魯必以賂奉齊是陽穀之盟之
所繇始也

十有六年春季孫行父會齊侯于陽穀齊侯弗及盟

六月戊辰公子遂及齊侯盟于鄆丘

季孫之辭盟賂不至也公子遂之盟賂至也以鄆丘
之賂償扈之賂猶恐其不至也是齊與魯教賂無已
也詩曰以爾車來以我賄遷

宣公元年六月齊人取濟西田

公羊子曰外取邑不書此何以書所以
賂齊也曷為賂齊為弑子赤之賂也

元年秋楚子鄭人侵陳遂侵宋

左氏曰宋人之弑昭公也晉荀林父以諸侯之師伐
宋宋及晉平宋大公受盟于晉又會諸侯于亳將為
魯討齊皆取賂而還蓋一平於宋兩會於亳皆賂為
鄭穆公曰晉不足與也遂受盟於楚與楚侵陳遂侵
宋故鄭之書人非貶也
其人鄭猶乏人晉也

七年冬公會晉侯宋公衛侯鄭伯曹伯于黑壤

與於會不與於盟止也止而不書何也以賂免也左
氏曰鄭及晉平鄭子公之謀也故相鄭伯以會冬盟
於黑壤王叔桓公臨之以謀不睦晉侯以公之不朝
也又不使大夫聘乃止公諸侯盟於黃父公不與盟

以賂免受賂者誰晉靈公也行賂者誰公子遂也公子遂以賂為功者也

十年春公如齊公至自齊

齊人歸我濟西田

何歸之歸亦賂也公以女妻高固高固請之則是公賂女也

成公二年冬楚師鄭師侵衛

十有一月公會楚公子嬰齊于蜀

丙申公及楚人秦人宋人陳人衛人鄭人齊人曹人邾人薛人鄆人盟于蜀

穀梁子曰楚其稱人何也於是而後公得其會與盟同月則地會不地盟不同月則地會地盟此其地會地盟何也以公得所申其事也今之屈向之驕也屈者何謂盟則公為政嬰齊稱人驕者何謂會則嬰齊為政公就會也嬰齊之所屈於公者何受公賂也嬰齊之所驕於公者何欲取公賂也然則公之得所者賂也何賂之執斷執鉞織絰皆百人蓋女賂也然則是非匱盟也而曰匱盟何也曰晉將匱我是可一也不可以再是皆所謂無辭而行情貴祿而賤行者也

是會也有壞坊者四焉四者何也晉為盟主而竊與楚盟一也盟楚則必賂楚賂楚則必賂晉二也蜀及陽橋皆在城下三也蔡侯許男皆乘楚車不列於伍而我與之比四也故春秋盟會之法至於蜀而匱矣而獨以城下之耻聞

三年春王正月公會晉侯宋公衛侯曹伯伐鄭

宋衛皆未葬而稱公侯故宋衛之不
子蔡許之無位是春秋之所以置也

十年公會晉侯齊侯宋公衛侯曹伯伐鄭

初晉之執鄭伯也踰時未歸公孫申曰我急君則晉
止君我出師以圍許為將改立君者則晉必歸君矣
明年二月鄭子如立公子孺鄭人殺孺立髡頑藥武
子曰鄭人立君我執一人焉何益不如代鄭而歸其
君五月晉景公薨厲公立鄭子罕賂晉以襄鍾子駒
為質乃歸鄭伯故質不如賂之信也諺不如賂之巧
也然則自宣公而後有以無賂免者乎楚之求鄭也
而猶重賂况其下者乎有之則士變之不以賂免鄭
也夫與其以賂免猶愈於立君
而免也與賂喪貨立君喪宅

秋七月公如晉

晉人止公使送葬春秋不書不書者何謂諸侯之不勤諸侯也惜乎其不以賂免也賂免之辱正於喪盟之辱乎曰以臣而自免則冒也以臣而免君則道也惜乎蜀之盟未為得所也然則後將執君求賂焉如何曰是亡國之誨也傷之云耳

襄公二年齊侯伐萊春秋不書惡寺人之通賂也寺人通賂則國無不賂者矣左氏曰齊侯伐萊萊人使正與子賂夙沙衛以索馬牛皆百匹齊師乃還君子以是知齊靈公之為靈也天下之靈者獨齊靈公乎哉詩曰誰能執熱逝不以濯

襄公十一年夏鄭公孫舍之帥師侵宋

何以侵宋曰決晉楚也晉楚爭鄭鄭奔命之不遑曰
吾伐宋以決之伐宋則晉必怒晉怒驟來楚不能驟
救吾乃重賂晉而遠謝楚也於是楚鄭伐宋晉會諸
侯于蕭魚悉師伐鄭鄭請行成于晉晉侯赦鄭囚禮
而歸之納斥堠禁侵掠告成于諸侯公使臧紇對曰
凡我同盟小國有罪大國致討苟有藉手鮮不赦宥
寡君聞命矣於是鄭人賂晉侯以師悝師觸師蠲廣
車軌車淳十五乘甲兵備兵車百乘歌鍾二肆女樂
二八及其罍磬夫以晉悼公也而
亦行賂乎其厲公二五之餘汾夫

襄公二十五年夏公會晉侯宋公衛侯鄭伯曹伯莒

子邾子滕子薛伯杞伯小邾子于夷儀

是伐齊也伐齊者何朝歌之役齊始伐晉張軍於焚
庭晉將執之而崔杼弑莊公以悅於晉使隰鉏請成

慶封如師男女以班賂晉侯以宗器樂器自六正五吏三十帥三軍之大夫百官之正長及處守者皆有賂晉侯許之於是晉送衛侯帑於夷儀崔子止之以求五鹿晉亦不敢問也而與齊同盟於重丘甚矣賂之為利也使盟主可伐賊可不討同盟可執舊怨可釋也甚矣賂之為利也

於是趙文子為政令薄諸侯之幣而重其禮穆叔見之謂穆叔曰自今以往兵其少弭矣齊崔慶為政將求善於諸侯武也知楚令尹若敖行其禮道之以文辭以靖諸侯兵可以弭記所謂禮先於幣帛者其謂此乎朝聘燕享禮也庭實貨賄幣也趙武能率士變之政則庶乎免矣

方范宣子之為政也諸侯之幣重子產寓書於子西以告曰子為晉國不聞令德而聞重幣僞也惑之僞聞君子長國家者非無賄之患而無令名之難諸侯之賄聚于公室則諸侯貳若吾子賴之則晉國貳諸

侯貳則晉國壞晉國貳則子之家壞何沒沒也將安
用賄夫令名德之興也德國家之基也有基無壞無
亦是務乎有德則樂樂則能久詩云樂只君子邦家
之基有令德也夫上帝臨汝無貳爾心有令名也夫
怨思以令德則令名載而行之是以遠至邇安無寧
使人謂子實生我而謂子浚我以生乎宣子悅乃輕
幣以子產之善規也而獨有取帶於叔孫豹取錦於
季文子取冠於公孫舍者故無辭而行情君子之所
禁也

遺利章第二十五

子云君子不盡利以遺民詩云彼有遺秉此有不斂穧
伊寡婦之利故君子仕則不稼田則不漁食時不力珍

大夫不坐羊士不坐犬詩云采葑采菲無以下體德音莫違及爾同死以此坊民民猶忘義而爭利以亡其身

是其為季文子晏平仲闔子文氏之行與其為苦成叔令尹子常羊舌鮒氏之行與季文子相宣成無衣帛之妾無食粟之馬仲孫它曰子為魯上卿相二君矣妾不衣帛馬不食粟人其以子為愛且不華國乎文子曰吾亦願之然吾觀國人其父兄之食麤而衣惡者多矣吾是以不敢人之父兄食麤衣惡而我美妾與馬無乃非相人者乎且吾聞以德榮為國華不聞以妾與馬文子以告孟獻子獻子囚之七日自是子服之妾衣不過七升之布馬餼不過稂莠文子聞之曰過而能改者民之上也使為上大夫齊侯疥遂店期而不瘳諸侯問疾者多在梁丘據與裔款言於公曰吾事鬼神豐於先君有加矣今君疾

為諸侯憂是祝史之罪也。蓋誅於祝，同史嚚以謝賓。公說告晏子，晏子曰：「有德之君，外內不廢，動無違事。其祝史薦信，無愧心矣。」是以鬼神用饗國，受其福。祝史與焉適遇淫君，內外頗邪，上下疾怨，斬刈民力，以成其違。祝史薦信進退，無辭鬼神，不饗祝史與焉。所以天昏孤疾者，為暴君使也。公曰：「然則若之何？」對曰：「不可為也。山林之木，衡鹿守之；澤之萑蒲，舟鮫守之；藪之薪蒸，虞侯守之；海之鹽蜃，祈望守之。縣鄙之人，入從其政，偏介之闕，暴征其私，承嗣大夫，彊易其賄，布常無藝，徵斂無度，官室日更，淫樂不違，內寵之妾，肆奪于市，外寵之臣，僭令於鄙，民人苦病，夫婦皆詛，祝有益也，詛亦有損。聊攝以東，姑尤以西，其為人也不矣。雖其善祝，豈能勝詛？若欲誅於祝史，不如修德矣。」公說，使有司寬政，毀關，去禁，薄斂，已責而公疾瘥。不然，雖狐裘三十年，豚肩不掩豆，侍舉火者三百家，猶未有遺民之利也。

闕且廷見令尹子常子常與之語問畜貨聚馬歸以語其弟曰楚其亡乎不然令尹其不免乎吾見令尹令尹問畜聚積實如餓豺狼焉殆必亡者也古者聚貨不妨民衣食之利聚馬不害民之用國馬足以行軍公馬足以稱賦不是過也公貨足以賓厭家貨足以共用不是過也貨馬郵則闕於民民多闕則有畔離之心將何以封矣昔闕子文三舍令尹無一日之積郵民之故也成王聞子文之朝不及夕也於是乎每朝設脯一束糗一筐以羞子文至於今尹秋之成王每出子文之祿必逃王止而後復人謂子文曰人生求富而子逃之何也對曰夫從政者以庇民也民多曠者而我取貨焉是勤民以自封也死無日矣我逃死非逃富也故莊王之世滅若敖氏唯子文之後在今子常先大夫之後也相楚君無令名于四方民之羸餒日甚四境盈壘道殣相望盜賊司目民無所放是之不郵而畜聚不厭其蓄怨多矣民心之愠

也若防大川焉潰而所犯必大矣子常其能賢於成靈乎成不禮於穆願食熊蹯不獲而死靈王不顧於民一國棄之如遺跡焉子常為政而無禮不顧甚於成靈其何力以待之期年乃敗於柏舉子常奔鄭昭王奔隨故不顧遺利以取民者若楚子常是也

叔向見韓宣子宣子憂貧叔向賀之宣子曰吾有卿之名而無其實無以從二三子吾是以憂子賀我何也叔向曰昔欒武子無一卒之田官不脩其宗器宣德行順憲則使越於諸侯諸侯親之戎狄懷之以正晉國以免於難及桓子驕泰奢侈貪欲無藝略則行志假貸居賄宜及於難而賴武之德以沒其身及懷子改桓之行修武之德可以免難而離桓之罪以亡於楚夫郤昭子富半公室其家半三軍恃其寵富以泰於國而身尸於朝家滅於絳不然夫八郤五大夫三卿其寵大矣一朝而滅莫之哀也唯無德也今吾

子有樂武子之貧吾以為能其德矣是以賀若不憂德之不建而患貨之不足將弔不賁何賀之有宣子拜稽首曰起也將亡賴子存之非起敢專承之其自桓叔以下拜吾子之賜故不爭利以亡身者韓宣子是也苦成叔不爭利猶可與樂桓子沒其身

晉自羊舌鮒為大夫而列國多賂平丘之會次于衛地叔鮒求貨于衛淫窮羗者衛人使屠伯饋叔向羹與一筐錦曰諸侯事晉未敢攜貳况衛在君之宇下而敢有異志翦羗者異于他日敢請之叔向受羹反錦曰晉有羊舌鮒者躋貨無厭亦將及矣為此役也子若以君命賜之其已客從之未退而禁之何為其賜之也曰叔向之權不足以制鮒也何為不足以制之也曰叔向不得君命叔魚能得君命其後叔魚竟以鬻獄尸於市故忘義爭利以亡其身羊舌鮒是也

別嫌章第二十六

子云夫禮坊民所淫章民之別使民無嫌以為民紀者也故男女無媒不交無幣不相見恐男女之無別也詩云伐柯如之何匪斧不克取妻如之何匪媒不得藝麻如之何橫從其畝取妻如之何必告父母以此坊民民猶有自獻其身

是其為鄮季姬與何為季姬也曰未繫之鄮也未繫之鄮而能使鄮子何也鄮無大夫以婚禮待於境上不得親迎則曰遇不待反馬則曰朝禮變而之正求正而之野是皆有父母之命也不及兩廟以正其終

始雖有嘉禮近於自獻其身故
禮不親迎不廟見猶之于遇也

僖公十有四年夏六月季姬及鄆子遇于防使鄆子

來朝

來朝則俱朝也不得曰以鄆子來朝於是越歲而于
歸猶之不廟見也左氏曰鄆季姬來寧公怒止之以
鄆子之不朝也夏遇于防而使來朝止則不遇遇
則不止且未繫之鄆故左氏詳外政而略內事也

十有五年九月季姬歸于鄆

何其久也公如齊從于牡丘九
月始歸公歸而後季姬歸禮也

十有六年夏四月丙申鄆季姬卒

書曰書國無所異於宋共姬也故季姬猶為有禮也
季姬沒三年而鄆子用於睢社僖公不哀故鄆子則
為匱禮也季姬非匱禮者也春秋之於諸姬多稱焉

二十三年冬十一月杞子卒

杞成公也

二十七年春杞子來朝

杞桓公也

秋乙巳公子遂帥師入杞

杞以客禮倣宗國

二十八年秋杞伯姬來

謝討也

三十一年冬杞伯姬來求婦

母黨之請婦未失禮也大國聘幣以卿大夫小國命于舅姑壽曰娶妻如之何必告父母伯姬求婦而以

為非禮則杞有卿大夫之役焉而又以杞為傲

文公十二年春王正月杞伯來朝

二月庚子子叔姬卒

哀叔姬也哀叔姬而爵杞伯何也曰杞伯來朝亢則抑之哀則揚之哀吾之子以及其宗夫為春秋者固得以子女進退人爵乎曰爵非春秋所自與也禮則春秋得而與之春秋以禮當爵亦得以爵當禮也

成公四年春杞伯來朝

五年春王正月杞叔姬來歸

八年冬十月癸卯杞叔姬卒

九年春王正月杞伯來逆叔姬之喪以歸

是則杞子之所為伯也杞伯同盟五十年矣再娶於魯出其婦不遺其喪則甚矣齊之歸叔姬者也哉其君而棄其母終惠公之世無有逆其喪者故曰夫婦之道廢而谷風之怨興哀杞叔姬所以弔齊叔姬也然則二叔姬有罪乎曰哀也何罪之有

厚別章第二十七

子云取妻不取同姓以厚別也故買妾不知其姓則卜之以此坊民魯春秋猶去夫人之姓曰吳其死曰孟子卒

記者之不與魯春秋何也曰是所以正春秋也正春秋而後春秋不繫於魯不繫於魯則仍魯春秋之辭何也曰權不變衡繩不改尺正其大者而其不正者皆正矣故文者附質而大者也質不變大大不損質故忠信者春秋之教也

晉公子重耳之入秦也秦伯歸女五人懷嬴與焉公子欲辭司空季子曰同姓為兄弟黃帝之子二十五人其同姓者二人而已唯青陽與夷鼓皆為己姓青陽方雷氏之甥也夷鼓彤魚氏之甥也其同生而異姓者四母之子別為十二姓凡黃帝之子二十五宗其得姓者十四人為十二姓姬酉祁已滕歲任荀僖姁僎依是也唯青陽與倉林氏同於黃帝故皆為姬姓同德之難也如是昔少典取於有嬌氏生黃帝炎帝黃帝以姬水成炎帝以姜水成成而異德故黃帝為姬炎帝為姜二帝用師以相濟也異德之故也異

姓則異德異德則異類異類雖近男女相及以生民也同姓則同德同德則同心同心則同志同志雖遠男女不相及畏黷敬也黷則相怨怨亂毓災災毓滅姓是故娶妻避其同姓畏亂災也異德合姓同德合義姓義相更成而不遷乃能攝固保其土房今子於子園道路之人也取其所棄以濟大事不亦可乎甚矣胥臣之辭也歸女五人豈無歡者而必懷贏君子猶畏其無別也鄭叔詹曰同姓不婚惡不殖也狐氏出自唐叔狐姬伯行之子也實生重耳成而雋材違離而得所是則同姓之不別晉猶有戎風焉昭公元年晉侯有疾鄭伯使公孫僑聘晉且問疾叔向問曰寡君之疾病卜人曰寶沈臺駘為祟史莫之知此何神也子產曰昔高辛氏有二子伯曰閼伯季曰實沈居於曠林不相能也日尋干戈后帝不臧遷閼伯於商丘主辰商人是因故辰為商星遷實沈於大夏主參唐人是因以服事夏商其季世曰唐叔虞

當武王邑姜方震太叔夢帝謂已命而子曰虞將與之唐屬諸參而蕃育其子繇及生有文在手曰虞遂以命之成王滅唐而封太叔故參為晉星繇是觀之則實沈參神也昔金天氏有裔子曰昧為元冥師生允格臺駘臺駘能業其官宣汾洮障大澤以處太原帝用嘉之封諸汾川沈姒蓀黃實守其祀今晉主汾而滅之矣繇是觀之則臺駘汾神也抑此二者不及君身若君身則亦出入飲食哀樂之事也山川星辰之神又何為焉僑聞之君子有四時朝以聽政晝以訪問夕以修令夜以安身於是乎節宣其氣勿使有所壅閉湫底以露其體茲心不爽而昏亂百度今無乃壹之則生疾矣僑又聞之內官不及同姓其生不殖美先盡矣則相生疾君子是以惡之故志曰買妾不知其姓則卜之違此二者古之所慎也男女辨姓禮之大司也今君內有四姬焉其無乃是也乎若繇是二者弗可為也已四姬有省猶可無則必生疾矣

叔向曰善哉肸未之聞也故
春秋之知禮者唯子產也

哀公十二年夏五月甲辰孟子卒

是所為吳孟子也何謂之吳孟子也吳或得子出而
稱孟子也公方幼而季孫為政公不得自娶孟子公
娶孟子則大臣主之公不得自為政自楚敗鍾房以
前公朝章華而後公皆未嘗入吳又自邾莒發難五
卻於晉公親見止兩執大夫未嘗藉吳之力故孟子
之非吳宗廟祝史所薦信也而孟子之稱吳甥舅伯
叔之藉口也當時公若之妹為宋元公夫人人生祁適
季平子於昭夫人同姓也故或以逐平子告夫人未
有逐平子告吳者也又二十餘年叔還始會吳于相
故自哀公六年以前吳未有盟會征討與魯之事也
吳楚始競吳數敗楚魯以子出於吳而繫於吳謂吳
孟子以張魯亦以張子也陳實張楚而藉吳見譏夫

有結婚強吳三十年無一介之問及至河五反身屈
於齊庭與公子慙相見不肯入晉而猶曰娶吳者乎
然則娶吳之說孰為之曰季孫為之季孫絀昭公欲
絀昭夫人不及哭不附於廟孟子之卒孔子與弔季
孫不絕故絀而拜謂是同姓非吾小君也是仲尼之
所悲也然則同時無有明之者何也曰季氏之服魯
久矣季氏戮昭公又以戮公之夫人魯人信之播於
外國故魯人之智不及榮駕鵠之智也然則仲尼之
不正孟子何也曰
閭事也閭事無諍

辟遠章第二十八

子曰禮非祭男女不交爵以此坊民陽侯猶殺繆侯而
竊其夫人故大饗廢夫人之禮子云寡婦之子不有見

焉則弗友也君子以辟遠也故朋友之交主人不在不有

大故則不入其門以此坊民民猶以色厚於德

舊分二節

君子公言不及內黨夫子何閑之諄也曰未有不閑而誠者也易曰閑邪存其誠謂其近情也而閑之閑之不止而又明言之不明言之則必有未閑者存焉故又重閑之也

莊公二年冬十有二月夫人姜氏會齊侯于禚

四年春王二月夫人姜氏享齊侯于祝丘

七年春夫人姜氏會齊侯于防

冬夫人姜氏會齊侯于穀

卷二
祝丘之有享則是大饗未廢也所謂陽侯
繆侯者晉楚之春秋與抑列國之春秋與

桓公二年春王正月戊申宋督弑其君與夷及其大

夫孔父

左氏曰宋華父督見孔父之妻於路目逆而送之曰
美而艷於是攻孔氏殺孔父而取其妻公怒督懼遂
弑殤公君子以督為有無君之心而後動於惡故先
書弑其君孔父之不能閑家則亦與有討也息媯之
美而滅蔡與息夏姬棠姜皆天數夫而滅人之宗故
君子立教質言之而不諱詳言之而不穢也若不入
主婦之門不友寡婦之子是也詩
曰折柳樊圃狂夫瞿瞿是之謂也

民紀章第二十九

子曰好德如好色諸侯不下漁色故君子遠色以為民
紀故男女授受不親御婦人則進左手姑姊妹女子已
嫁而反男子不與同席而坐寡婦不夜哭婦人疾問之
不問其疾以此坊民民猶淫佚而亂於族

為是坊者其唯敬姜與敬姜者公父文伯之母也朝
哭穆伯而暮哭文伯仲尼聞之曰季氏之婦可謂知
禮矣愛而無私上下有章

公父文伯之卒也敬姜戒其妾曰吾聞之好內女死
之好外士死之今吾子天死吾惡其以好內聞也二
三婦之辱共先祀者請無瘠色無洵涕無指膺無憂
容有降服無加服從禮而靜是昭吾子也仲尼聞之

曰女知莫如婦男知莫如夫公父氏之婦知也夫又曰公父文伯之死妾經而殉者三人賢士未有至者敬姜遂不哭也

敬姜之將室文伯也饗其宗老而為賦綠衣之三章老請守龜卜室之族師亥聞之曰善哉男女之饗不及宗臣宗室之謀不過宗人謀而不犯微而昭矣

敬姜者季康子之從祖叔母也康子往焉闔門而與之言皆不踰閭祭悼子康子與焉酢不受徹俎不宴宗不具不繹繹不盡飫則退仲尼聞之以為別於男女之禮矣敬姜如季氏康子在其朝與之言弗應從之及寢門弗應而入康子辭於朝而入見曰肥也不獲命無乃罪乎敬姜曰子弗聞乎天子及諸侯合民事於外朝合神事於內朝自卿而下合官職於外朝合家事於內朝寢門之內婦人治其業焉上下同之

夫外朝子將業君之官職焉內朝子將元季氏之政焉皆非吾所敢言也

然則記者之言其崇敬美與其猶為祝丘之享防穀之會也曰夏徵舒之從殺其君東郭偃之嗣滅其宗涇上之聚不歸於王莒處之惟不聘而從君子猶或非之故蔓草零露非鄭志則莫之誦也

親迎章第三十

子云昏禮壻親迎見於舅姑舅姑承子以授壻恐事之違也以此坊民婦猶有不至者

親迎禮之始事也而坊記以為卒事言人事之終始也袁公曰冕而親迎不已重乎孔子愀然作色曰合二姓之好以繼先聖之後以為天地宗廟社稷之主何謂已重乎故親迎即位薨葬郊祀勤王此五者春

秋所以坊德也五者皆失而以命從欲先王之刑乃窮矣故聖人以天命禮以天命刑以天命命而一其權量於春秋丁寧終始於昏迎之事易之咸恆詩之關雎亦與坊記同義也

桓公三年秋七月壬辰日有食之既

公子翬如齊逆女

九月齊侯送姜氏于謹

公會齊侯于謹

夫人姜氏至自齊

穀梁傳曰禮送女父不下堂母不出祭門諸母兄弟不出闕門父戒之曰謹慎從爾舅之言母戒之曰謹

慎從爾姑之言諸母般申之曰謹慎從爾父母之言
送女踰竟非禮也左氏曰凡公女嫁於敵國姊妹則
上卿送之以禮於先君公子則下卿送之於大國雖
公子亦上卿送之於天子則諸卿皆行公不自送於
小國則上大夫送之然則是為卿逆君婦者也諸侯
自親迎而公不送女可乎曰何為不可也君有社稷
之守壻有宗祧之重子子父父何為其不可也且夫
桓非親迎者也厚幣而自固者也然則自謹而後魯
不入齊者何也曰春秋之許魯
猶以有別也齊有風而魯無風

莊公二十四年夏公如齊逆女秋公至自齊八月丁
丑夫人姜氏入

是親迎也親迎而婦不至公至踰月而後乃入則猶
之不至也故哀姜之不正終曰過始也過始則美盡

矣美盡於始者
盡壞於卒也

文公二年冬公子遂如齊納幣

四年夏逆婦姜于齊

高子曰略也略則公子遂之略之也左氏曰貴聘而賤逆之娶于大夫而卿聘之不使卿逆之卿傲其大夫而適傲其夫人族下不尊親寡無援赤視之不允則自此始矣然則公娶於大夫亦可親迎乎曰公娶於大夫舍於先公之廟公為之主亦使卿送之大國則無娶於它國之大夫者也而魯以高國比於婦姜

宣公元年春公子遂如齊逆女

三月遂以夫人婦姜至自齊

婦者宗廟之婦非為姑婦之也且是有夫夫其公子
遂逆而敬嬴迓之一仲遂也而以夫人及婦不難乎
其為子與夫者乎故春秋
之大若詳也大詳則旨疑

成公十四年秋叔孫僑如如齊逆女

九月僑如以夫人婦姜至自齊

是猶之仲遂也夫其叔孫僑如逆而穆姜迓之穆姜
之於敬嬴叔孫僑如之於仲遂可以同辭可以同情
幸乎其不親迎而猶且至也然則莊公之會杞伯姬
於洮與齊侯之送姜氏於讎有異乎曰均之乎愛女
也非所以愛禮也然則莒慶之逆叔姬齊高固之逆
子叔姬有異乎曰均之乎親迎也莒細而從高挾而
倨然則杞伯姬之來鄆季姬之歸皆細也而春秋謹
書之何也曰家人與睽互相反也家人在內而閑睽

在外而疑其閑之曰悔亡其疑之曰永曰鬼曰張弧
曰脫弧故家人反外雖聖人不能不疑者誠敬之也
誠慎之也謂禮刑命三畏者之所攸
寄也故唯記者為深知春秋之義也

坊記集傳卷二

欽定四庫全書

附錄坊記春秋問業

明 黃道周 撰

春王正月

商應椿問春秋三書無冰皆當春月則周正建子三
春正當沍寒之時冰泮溷於鑿冰之月不知周公何
所取而以子月革夏正也今云作洛土中以八尺之
表定晷南北觀其進退以為端始冬至日道自南而
北日晷自北而南是為履端之候叶於天統故用為
周正雖云一王之憲其實顛寒暑而錯溫涼於東作
西成南訛朔易之
義不知何處符合

答云周人雖以子為正月只是頒朔郊祀朝覲以一
日為始至於農事民時縣布象魏如何變得逸周書
時訓解曰立春之日東風解凍又五日蟄蟲始振又
五日魚上冰此皆與夏正同用如何變得周頌云維
暮之春亦又何求亦蓋清明穀雨時也所以周書又
云越我周王致伐于商改正異械以垂三統至於敬
授民時巡狩祭
享猶自夏焉

應椿云然則程胡二傳皆云以夏時冠周月垂憲後
世何也答云此亦假借之言猶云起例於此託意於
彼耳春秋為魯史受朔於王閏不告月猶且書之如
何敢變一王之憲者其三書無冰皆當春月則建子
無疑但在歷法以南至首春則正月無春只有春二
月春三月商正建丑以立春為中氣亦五年間遇不
可為常必以夏至為夏之極冬至為冬之極每過冬
中至朔相合准為閏月則大寒立春已入寅限又依

然夏時矣春秋以三正並建本周公之意行天王之
令故書春王正月春王二月春王三月以春月之有
王救正月之無春亦所以因事省事以王統天之義
也胡逢甲云王班朔則書王正月王不班朔則不書
王正月襄公二十七年十一月辰在申哀公十二年
十二月火猶西流十三年復然皆司歷之過杜氏以
長歷推之於是置閏其明年皆不書王正月若王置
之則當書王正若魯置之諸侯無改憲之義不書王
正其諸以

病魯與

答云不班朔不書王正與不郊不書王正同義然僖
公二十四五六年天王出居於鄭昭公二十二三四
年王室亂天王居於狄泉不應此時獨行郊祀頒朔
之禮蓋此時播遷天王應有禮於侯國春秋亦欲以
此正侯國之不勤王者故於此數年皆書王正月不
然隱公九年天王使南季來聘此時王室無事禮問

數通何以不書春王正月及桓公十八年間僅三書王正必是郊祀頒朔與春秋正權兩意互用不在置閏不置閏有春無春之間也

胡逢甲云春秋之例時遇無事則書首月若其中有事者以時舉則不月舉也舉月而書王以為正權舉月而不書王亦以為正權則正權之義彼此通掛兩來其辭與答云郊祀頒朔正權三者通有所取聖人於此意有淺深但事遠文湮莫得而詳也

逢甲又云自古改正皆不易月商人元祀十有二月時以立春若值中氣可稱王正矣即不值中氣猶以烝命祀如何便云建丑也如周月建子而春祭仍烝不待頻瀆其譏已見時訓乃云敬授民時巡狩祭享猶自夏者若此三事自夏則更不須改正矣若以為頒朔讀法朝賀之類則今頒朔朝賀亦正子月不得

云改正也且如函風以陽紀日則曰一之日二之日
三之日四之日以陰紀月則曰四月五月六月七月
而改歲躋公皆在十月之後不稱十一月十二月又
不稱正月何也答云聖人因時以示禮樂三冬農隙
歲事告成日月干支始於子甲甲之與子通得為正
故數甲者命日數子者命月敬授兩舉以示民有事
也以日舉之則曰正日以月舉之
則曰正月詩與春秋初不相悖也

逢甲云然則周時周月兼得干支之正伶倫軒轅合
與春秋同軌而夫子又云行夏之時何也答云帝王
不相襲禮舉日舉月則周人為正舉歲舉時則夏時
為正周人親親報本於農隙之後夏勤溝洫立正於
于邦之初兩者異大而同質若云作訛成易或干其紀
則南至始春夏至始秋四仲之月皆得中氣譬如周
易屯蒙始春咸恆始秋不必泰否以分春秋姤復以
稽冬夏也夫子刪述一以周公為本至論為邦則是

夫子自家主意耳道有
并行者不更疑貳也

戴造問隱公不書即位可是攝可是不當立可是從
公之志可是不請命於天王曰只是不請於天王耳
隱桓皆庶而隱為長當時得王命則當立無疑篡弑
之禍亦息矣戴造云桓文宣成襄昭哀七公即位豈
皆請命於王州吁鄭忽亦皆請命於王如何不成其
為君答曰聖人之言義不一起或意有并存則特舉
其重者要於垂法
立憲不失本意而已

公及邾儀父盟于蔑九月及宋人盟于宿

戴造問隱公未即真邾子未拜爵兩家同盟何以稱
謂何以告明神且何以要約捍災卹患也答曰春秋
稱公豈有不即真之理如四年遇宋公於清六年會
齊侯於艾彼國自然稱魯侯不得稱魯公子也隱公

初即位便要圖霸三月及邾盟于蔑九月及宋盟於宿只此是一部春秋後來諸侯盟會相尋列國爭長皆於此始皆於二年于潛于唐徹底映現惜其才不遠桓文年不逮莊僖耳春秋許多事皆於隱始權輿

鄭伯克段于鄆

陳有度問春秋魯史為何元年突書鄭志答云春秋隱桓原本常棣隱公不能克軌而鄭伯克段春秋於此初無貶辭要為寫舍鍾巫發其底本有度云然則春秋與鄭伯與曰鄭伯猜狠固不敢例周公然使周公誅管蔡亦不得不書曰辟管叔於商放蔡叔於郭也叔段稱兵啟期襲鄭鄭伯克之於其巖邑聖人直書如克敵然它日陳侯之弟招宋公之弟辰有所訓討皆直以弟係之向使寫舍之難隱公不死桓公出奔亦不過書曰公子軌出奔某耳又使桓公據邑襲魯隱公克之亦必書曰公克軌於某何為其討鄭莊

公也然則莊公處心積慮陷段於辟春秋在所不討與曰討鄭莊公則不得討魯桓公鄭莊公不成其克則魯隱公不成其讓讓喪其名克成其實而叔段與桓公同道也聖人據事直書無所褒貶雖云鄭志而魯志畢見州吁公子馮公子忽之義並

見於此故元年七事春秋之綱領也

陳允元云鄭莊公以祊易許射王中肩春秋諸侯第一敗類故於隱之初年特表其事以志倫常之變如隱公不容桓公豈得免於春秋之討今以克段為無貶辭然則三傳皆非與答曰三傳之不與鄭伯固是恆理然使段入鄭據鄆為鄭伯者何以處之防患未然聖人有所不能大義滅親君子有所不避隱公讓不成讓攝不成攝使如鄭莊蚤察京叔去公子翬不至滋蔓雖老於菟裘終於正寢無不可也允元云爵位細事倫常大故隱公雖見弑於子翬亦無殺弟之嫌莊公雖克敵於京城終有殘忍之惡以此看春秋

豈不完美答云此亦正論但看克段二字不書母弟聖人於莊公身上略放得過來宋辰陳招兩事對

證分明

允元又云坊記引祭仲之言以為春秋大坊還是從經起見從傳起見答曰坊記所稱統在春秋經傳之後隨其所見以錄遺言自然與春秋吻合不必謂夫子之言本於祭仲也

天王使宰咺來歸惠公仲子之賵

商應椿云仲子為桓公之母先卒無疑三傳俱謂天王之尊不宜下賵諸侯之妾而康侯專責宰咺以冢宰書名見宰之非宰也先儒攷周禮宰夫掌國之弔事戒令與其貨賄或此宰為宰夫之宰未必便長六卿不知是否答云凡此等失皆在天王成風之卒王使榮叔歸舍且賵其葬也王使召伯來會葬皆去天

稱王而於榮叔召伯無譏焉仲子之贈安得獨責宰
咥不責天王蓋是春秋初年王不稱天則無以正其
始據事直書善惡自見宰咥
之為太宰與宰夫可無問也

胡逢甲云天王賜諸侯之妾或是魯宋交請而然未
必春秋專責天王答云春秋之意只為隱桓構難皆
從此始嫡妾不正則兄弟不定兄弟不定則冰霜馴
致矣子克子頹子朝之亂王室比比而然故春秋特
筆其事以正王國非獨以正魯國也逢甲云然則成
風之卒已在惠襄二王之後無叔帶狄后之亂而春
秋特嚴其文書王去天不專為正名發
輿曰春秋正名以坊百世不即事以坊一時

鄭伯以璧假許田

戴造問隱公八年鄭伯使宛來歸祊庚寅我入祊經
不言鄭以祊易許也至桓元年始言鄭伯以璧假許

田豈有易許四年魯不歸地而別書曰假者古人謂
彷彿於許佐之以璧是則賈胥之道春秋為何筆之
於經如謂魯鄭紊亂王制私相易地則取郕取防入
向入極取婁牟取戴雖小國之君亦悍然為之假許
入彷彿未為大事何為鄭重其辭乎答曰周室之東鄭
人世為司徒及平王既殂王室日衰鄭首叛周自為
雄長其初心畏宗國以彷彿我我受其餌與之伐宋
於是陽假王命陰取諸小國以自益也隱之末年始
與齊魯入許及桓公立微有佐助之功乃明假許田
亦心輕桓公以為不如隱之時矣故方隱時取郕取
防皆歸於魯及假許田僅藉以璧非輕許田輕桓公
也桓公身為篡弑無宗國之望宋衛同惡相濟王不
能討又取鄆劉為邦之田於是明年遂顯叛王繻葛
之戰天下無敢問者則自垂越之盟始也故鄭伯以
壁假許田晉侯以壁
假虞師先後同智也

齊侯衛侯胥命于蒲

陳有度云齊衛胥命四傳皆以為近正今直以為奸命何也答云春秋重錫命霸主會盟亦申王命耳齊鄭宋衛當年未合及宋之亂衛將與齊合後此數年戰於郎盟於惡曹齊與鄭衛相從皆從蒲始也故蒲之胥命非從王明矣非從王而胥命則猶之奸命也然則四傳皆以為近正何也曰莊公二十一年鄭虢胥命於弭弭從王也蒲非從王也以弭之傳訓蒲之經是四傳所以同誤也

春正月己卯烝夏五月丁丑烝

商應椿問桓公八年再烝將為春夏失時抑為重烝見瀆乎答云祭義禴為薄物以祭烝為備物而享言夏物未成而冬品咸登也書曰享祀母豐于昵雖云祖禰之廟維均而夏冬之義可辨若槩以繁多為主

則祀媿精禋禴禘薄物矣聖人先以薄正而防獵較故於春夏盛祭皆題之曰烝所以示禮之因時而道之貴節也或謂舊大之誤當亦不然

鄭伯突出奔蔡鄭世子忽復歸于鄭

陳允元問桓公十一年突歸于鄭鄭忽出奔衛突忽兩名無所去取至十五年始書鄭伯突鄭世子忽兩爵似有是非何也曰忽突初年宋執祭仲宋人為政忽突中年祭仲復君鄭人為政宋人為政在喪期之內皆不稱子曰未成君也以人與地以地與人曰是鄭之突忽也而忽得稱國則微與忽矣鄭人為政在五年之內君臣已定突雖篡國猶得稱伯忽雖失位得稱世子又以世子復歸則明其初年之得稱子也然則春秋與祭仲乎曰祭仲置君如夾拱然何為其與祭仲也然則春秋與忽乎曰桓公十七年高渠彌

弑忽而立疊春秋不書何為其與忽也然則春秋與
突乎曰鄭伯七會諸侯定王於櫟雖欲不鄭伯之不
得也然則春秋以忽方子糾以突方小白乎曰齊鄭
非匹功過各別其大率猶此也然則鄭忽五月已葬
不稱子忽衛朔四月未葬得稱衛侯何也曰鄭忽從
經衛侯從史經正其大史沿其細然則納朔不義故
伐衛者稱人納突亦不義而伐鄭者從王鄭突從王
衛朔非從王者也然則皆書公至自伐鄭至自伐衛
何也曰伐則有別至則無別也出
而告廟有異辭至而告廟無殊體

師次于郎以俟陳人蔡人

朱垣問春秋書法未有如此之異者救師稱次此非
救郎也而亦稱次如是齊召魯師不應更俟陳蔡如
是魯召陳蔡不應三時空行如是陳蔡違命不應更
筆之書如是魯欲取郎不應累露之久臨川吳氏謂

齊欲取郕微兵於魯與陳蔡魯因奔命於齊而陳蔡不與焉此時魯未服役於齊安得陳蔡不至而魯人獨恭答云此是齊魯爭郕也垣云如是齊魯爭郕則不應書師及齊師圍郕也答云魯以兵威脅齊取郕以為郕必降魯及郕降齊而魯意乃替故首書春王正月以治伐同姓之罪既書次書及書還皆不稱公以諱不成師之恥本傳甚明臨川吳氏失之垣曰然則次於即不日而甲午治兵書日何也曰次於即月舉之也甲午治兵日舉之也月舉則已緩日舉則已速月舉則已潛日舉則已著

齊侯宋人陳人蔡人邾人會于北杏

朱垣問是會有宋公邾子一聚稱人唯齊侯稱爵胡氏謂四國無王推戴霸主故亦斥而稱人齊桓始霸能平宋亂故與而書爵此義云何答曰與霸主則不得斥與國斥與國則不得與霸主也蓋是宋御說初

立未諸於王不得稱公不稱宋公故不稱邾子猶無所褒貶也朱垣曰是時宋人未服齊桓是以明年春齊人陳人曹人伐宋則此時宋人不得稱公也胡氏謂齊自弒譚之後二十年間未嘗遣大夫為主將亦未嘗動大衆出侵伐將卑師少故稱人然與曰春秋書人者皆不許大夫擅兵或國小未成君也君不在而書人舉衆稱師皆從其實非有褒貶也朱垣曰烏程姚氏稱齊桓盟會則皆書爵滅伐執降則皆書人然否答曰此亦不同閔公元年齊人救邢而亦書人僖公六年伐鄭圍新城而亦書爵何必貶之書人褒之書爵也春秋於此等皆書其實間有褒貶去爵書人不盡為例也

城楚丘

陳有度問三城而書不同城邢之義著矣城綠陵而書諸侯城楚丘不書齊師又不書諸侯公穀胡氏謂

不與專封盱江鄧氏謂大桓公之功欲以城楚丘公之天下兩義云何答云左傳謂魯後至故以自城為丈此必有據如專封之說必不可通諸侯有難相率捍患因其師衆城彼故墟何專封之有如狄滅衛不能伐狄狄去乃遷為城楚丘此又何足大於天下乎春秋不與專城其有城者皆自為功雖曰遷衛之事魯受其功可也

四卜郊不從乃免牲猶三望

陳允元云魯史惠公請郊禘之禮史角止之則是成王初無賜大禮之事魯公亦無受大禮之理先儒論之詳矣今信禮記而非魯史以為郊祀不請於惠公不始於僖公則自僖公以前六十七年春秋無卜郊之文無吉禘之禮何也曰史角止惠公之請不出世家亦是後人臆說祝鮀說王室之賜周公禮籍祝史

必不是矯誣的事如閔宮之詩夫子稱之曰頌春秋
考仲子之宮初獻六羽則八佾郊禘其來舊矣夫子
歎周公其衰蓋歎三桓非歎周公也魯卜郊而三家
雍徹魯三望而季氏旅泰山若孔子之於周公又何
間焉允元云然則杞用夷禮而魯人討之舞用旌夏
而韓子變色所謂夷禮亦猶之旌夏也齊桓糾合諸
侯遂欲僭用封禪僖公為齊桓愛塔見杞宋皆用大
禮遂僭卜郊理或有之答云周德雖衰天命未改襄
王之却請隧王孫滿之阻問鼎晉楚兩霸莫之敢干
魯僖親事桓文安得於此自干罪討即如魯頌白牡
駢剛四字儼然典禮豈是後人創得勿
以夫子之歎周公疑成王之壞王典也

胡夢錡問云古者郊祀九再舉正月之郊為祈穀月
令及孟獻子所言是也十一月之郊為報本郊特牲
所言是也周用建子以十一月為正月而僖公三十
一年以四月卜郊則是夏二月也啟蟄而雩原不為

過然春秋書郊非雩書雩非郊也僖公以四月卜郊
自是以後成十年四月五卜郊襄七年四月三卜郊
十一年四月四卜郊皆沿為故事又如宣三年以正
月三望成七年五月三望文十五年以五月郊成十
七年九月用郊是皆何義也答云只論其當郊不當
郊勿問其月矣禮常祀不卜天子大郊在十一月正
月魯供柴望之事焉故不得於是月郊不得於是月
郊則必為之更卜郊魯之更卜郊禮也更卜郊而於
二月七月亦禮也因而差池從卜焉耳卜而不從再
讀三讀則庸人不為之矣夢錡云然則郊卜而禘不
卜何也答曰魯之有禘魯公之世守也白牡用於太
廟駢剛用於世室禘祭大享則后稷為始祖而周公
魯公分昭穆焉周室郊祀后稷配天大王配帝享於
明堂禘禘之祖始於帝嚳魯不禘嚳而禘稷不祖文
王而祖周公以視天子之禮隆殺不同未為僭也周
公身作禮樂魯公之所聞見決無冒昧承受之理闕

宮之頌曰皇皇后帝皇祖后稷周公皇祖亦其福女
是其驗也夢銷云魯周公稱太廟魯公稱世室韋公
稱宮閼宮其為姜姬之宮與僖公之宮與曰頌稱奚
斯所作奚斯莊公時人則必非僖公之宮也舊說魯
人特祀姜姬疑或有之但其詩作於僖公之時耳夢
銷曰然則太廟八佾世室不過六羽韋宮亦用八佾
何與曰唯有韋宮之僭所以有三家之僭若世室身
受禮樂八羽六羽猶在可否之間也夢銷又云天子
曰禘諸侯曰祫自魯人用禘又以禘為祀典之通
稱如閼公二年夏五月吉禘于莊公僖公八年秋七
月禘于太廟用致夫人皆指大祭為禘而詩書所稱
祠禱嘗烝無有直指為禘者不知魯論兩舉禘字亦
泛指大祭與曰魯論所舉禮記所歎直為
非禮而發已經夫子嗟悼不費後人譏彈

楚子使椒來聘秦人來歸僖公成風之祿

朱垣問秦楚當時皆為霸主文公九載仁問未宣何為秦楚同時見禮答云聘問自是常事十二年秦伯使術來聘皆繇我有聘問彼此往還不足為異也先年秦穆之卒必有含贈此來歸隧亦自應爾但不以成風先於僖公為春秋特義耳朱垣云楚子當時經略中原明年遂與蔡侯次於厥貉秦人今年歸隧明年伐晉十二年秋來聘冬與晉人戰於河曲還是異類巨測借禮樂以為兵端結與國以疎盟主也答云春秋時事實亦難言厥貉之次楚人田於孟諸宋公為右孟鄭伯為左孟陳蔡楚皆從焉所未致者魯耳故先使椒覘國執帶甚傲便是覘國之徵非為好會也文公娶於齊而嬖敬嬴敬嬴之於文公猶成風之於莊公也敬嬴此時已不事出姜私結仲遂秦人為其國女來歸成風之祿妾母當嫡其意昭然春秋表於九年前應於九年之後知微知幾晰於毫釐

公會晉侯衛侯於瑣澤

胡逢甲問瑣澤之會春秋變文左傳稱宋華元合晉楚之成盟於宋西門之外鄭伯如晉聽成會於瑣澤春秋於此削宋楚鄭不書但書公會晉侯衛侯六國會盟晉楚交質亦春秋中年第一變局而聖人裁約其辭若尋常相遇者雖以深擯宋鄭又何以況存魯衛以六國營營之謀而聖人汎汎消之何如不書之愈也答云宋鄭和楚必是魯衛後至者從晉先至者從楚晉楚之從不相加戎則魯衛得矣宋鄭失矣瑣澤之會書其後至者所以深惡從楚存中原之盟主重宗室之藩翰也

公會晉人鄭良霄宋人曹人于澶淵

戴造問澶淵之會趙武為政是彊戚田取衛邑以賜孫林父又為林父執衛侯故諸大夫皆書人而獨書鄭良霄何也答曰自蕭魚而後鄭行人良霄見執於楚然已一意中國不替晉盟故鄭之大夫皆以名稱

故向之會齊宋諸國皆人獨書鄭公孫蔓伐秦諸國
苟偃而外亦唯鄭衛稱名是後公孫舍之入陳公孫
夏伐陳公孫段城杞終良霄之世鄭有大夫春秋若
喜鄭大夫之得會於諸侯也或曰子產為政其大辭
可觀則當伯有時子產尚未為
政安得以一子產崇諸大夫也

作三軍舍中軍

胡夢錡問季孫宿作三軍三家各專其一季氏盡徵
其賦不入於公孟孫使半為臣若子若弟叔孫使盡
為臣此是何說曰自國政而外臣與子弟皆有祿食
半為臣子弟者是此二分併於公一分歸於已公食
其半已食其半也盡為臣者公得其臣已得其子弟
皆半也而孟孫以子弟賦於公叔孫以子弟賦於已
季孫初不與臣子弟之事然有外國聘問禮樂干戈
其漸浩大不得不舍中軍舍中軍者不專任中軍之

事欲以二軍併征其賦外而應酬兵食內而臣若子弟作四分而以二家通給之已專調度而已名為復古其實是卑公室名為反正其實專利也夢鏞曰左氏則是如此其實兵多則賦隨聲大則實虛自作三軍而後履畝丘甲皆有所不給是以子產退處於男鄩人不繫於屬國皆以避虛靡之聲遠內匱之既也自季孫初作穆叔已知其必舍然既舍而後依舊兵車八百餘乘所以魯國終於不振不知夏人一旅周人三單其初規模如何卒致彊盛答曰治兵治賦自有別才雖說多不如少少不如精其實只要人人有若臣若子若弟之意令無若臣子弟之意雖抗衡盟主坐朝小國無有不敗之理是季孫之見所以劣於孟叔二家也

元年春王

胡夢錡問定公元年只書春王不書正月或以定公不得正其始或以為不與季氏之頒朔兩義何居答云聖人立言豈於此處弄其巧拙正月自為正何與正始上事頒朔自在王何與季氏家事此處裁奪豈成春秋即於此處裁奪不書春王猶為冷雋譬如夏五闕大自是後人闕漏如夫子當日闕之有何義味正不如不書之愈也此處恐是聖人有去處未屬筆者聖門諸子一辭莫贊直復存之使後人繹思亦是致一番意

從祀先公

商應椿問三傳皆云正僖閔之逆祀也胡氏獨主蜀馮山之說以為從祀昭公於義云何答云左傳及公穀皆有傳聞之言百世後如何以臆改事當日陽虎欲暴季氏之惡直當正奪嫡之罪則無處可置定公

如改謚別葬之非左氏明有記載何獨於此追說閔僖也應據云春秋每書宮廟必舉其謚此不書閔僖而直書先公猶言禘廟也必為昭公無疑答云若昭公無廟必書作昭公廟昭公無主必書作昭公主襄昭之間從無逆祀雖欲從祀無從也事不考經傳直以意斷之則夫人可稱世卿魯人皆無篡弑矣應據云別葬道南即是逆祀當時祭享有不順理處昭公至是始得從祀於太廟想亦當然答云定哀是所見之世傳說冬十月禘於僖公順祀先公而祈焉不必更為馮山之說

齊侯陽生卒

戴造問鄆之師公會吳子以邾剡之師伐齊南鄙齊人弑悼公赴于師吳子三日哭于軍門之外胡氏謂春秋不著齊人弑君之罪亦猶鄭伯髡頑弑而書卒不忍以夷狄之民加中國之君此義云何答云春秋

立言本天理以察人事如使弑者書卒卒者書弑何以傳信於天下百世大抵左氏據史或得之傳聞聖人察理以存為本崇崔杼弑君以說於晉晉人為之退師陽生之卒又合齊侯環故事魯人舍環而稱光用以譏嘲齊人謂是崔子故智非其實也鄭伯髡頑不禮其臣以卒於會君臣離心或借其事以為兵端未必子驪使賊殺之而子驪以欲從楚卒自賊也春秋存其實左傳存其疑緣疑察實何礙之有

紀子帛莒子盟于密君氏卒

張鼎臣問隱二年紀子伯莒子盟于密公羊曰無聞穀梁兩說曰紀子推先莒子為伯又曰紀子自以為伯此是如何答曰履繻字子帛從左何疑公穀無聞祇成杜撰鼎臣又問隱三年夏四月辛卯君氏卒公穀胡氏均以為尹氏猶武氏仍叔之子蓋譏世卿云左氏以為聲子今坊表記又以為君夫人何所取裁

答云內事單書內人稱氏王子虎劉文公此有關繫所以存周也尹氏何係不名不字存之於經則是褒世卿耳何刺之有鼎臣云春秋繼詩而作故尹氏仍叔之類皆見於經必如君氏亦不著姓非似氏孟子之比何以為君夫人答曰子卒不稱子赤謂其且成君也君氏卒不稱夫人謂其未成禮也觀似氏孟子之書日月與君氏子卒之不著名氏而內外隆殺情誼之微燦然見矣

張鼎臣又問繻葛之戰鄭敗王師既射中肩又乃勞之此與司馬懿哭曹髦何異即如叔段馳馬試劍其徒作詩不過侈其食飲射獵之事非若曲沃叔即我聞有命者而莊公刻意厚崩以成其殺今若寬宥之者何也答曰試使它人處此有甚於驅段奔共者將謂玄武門之心劣於朱雀桁耶春秋特論甚恕切勿深剝一層鼎臣云射王中肩如何恕得答云此事不見於經傳聞之世不知當日所見如何

陳允元問讀春秋當識其大者今既不論華夷之防
但從五倫看起如朋友兩字作如何看答云朋友信
之何嘗見朋友終日有許多盟誓攻伐侵執之事允
元云如公子友如陳蔡原仲未為違禮公穀疑其出
奔胡氏直引縣子之論以證左氏之說畢竟如何答
云陳莊子死赴喪於魯魯人欲勿哭哭繆公召縣子而
問焉縣子曰古者束修之問不出境雖欲哭焉得而
哭諸今之大夫交政於國雖欲勿哭焉得而勿哭猶
是語也公子結媵陳人之婦遂及齊宋盟沿習已久
季友有託而逃季友之葬原仲猶季札之聘上國如
春秋責脩季友何以閔公元年喜其來歸故朋友之
義於季友季札特見焉耳後漢紛紜千里會葬亦於
是起如說委國政市私交則公子牙

公子慶父為政季友何推委之有
陳有度云春秋立禮只為三坊齊桓之隕越下拜晉
文之出入三觀不足以坊德殺哀姜誅觀狀不足以

欽定四庫全書


坊淫立五子納懷羸不足以坊欲然且聖人亟取之
何也答云春秋若無五霸決不成天下看他三際中
停無霸之歲諸侯凌遲蠻荆縱肆有不可勝言者有
度云如何是三際中停答云僖公十八年已卯葬齊
桓公此是一際襄公十一年已亥蕭魚之會此是一
際桓公而後天行不及晉文入際十四年而殽晉悼
入際四年而殤參而兩之中分百二十一宣公七年
已未黑壤之會為春秋中際明年楚滅舒蓼為晉楚
分始除隱桓初際二十九年此時無霸諸侯沓雜蔑
宿潛唐石門瓦屋浮來中丘垂越稷鄧羸蒲惡曹折
闕夫鍾曲池穀丘虛龜武父艾袤黃趙無地不盟無
年不會至於小大相凌弱肉強食入向入極牟婁長
葛郕妨郕防郎奚或戰或侵東國之師無有寧極久
而後齊桓公晉文公襄公出焉襄公之烈不及桓文然
猶再卻秦師伐狄救江獎厲王室申大義於天下文
公十四年伐申乃入中際天下無霸有星孛于北斗

齊公子商人弑其君舍宋人弑其君杵臼齊人弑其君商人魯弑其君赤晉趙盾弑其君夷臯鄭公子歸生弑其君夷黑壤之明年楚人滅舒蓼陳夏徵舒弑其君平國楚子滅蕭伐宋圍宋晉滅赤狄王札子殺召伯毛伯邾人戕鄆子于鄆三十三年之間綱常紊亂諸侯汎汎如河中木蜀之盟天下從楚蟲牢馬陵不足以固鄭久而後晉厲公悼公出焉厲公三申王命得於鄆陵悼公三駕服鄭以綏中國凌遲至於定哀乃入末際此時無霸又二十九年召陵侵楚臯鮑乞盟蔡師幸勝於柏舉晉人遺力於鮮虞鄭人收局於滅許二卿肆志於圍鄆於是盟誓又繁侵伐四出拔鹹沙瓦曲濮五氏安甫垂葭黃牽蘧篠句繹祖鄆橐臯黃池齊晉之長漸於吳越而家臣柄政霸國分裂頓胡入楚蔡人再遷魯以邾子宋以曹伯大夫卿士之奔軼外國者不可勝數也故隱桓為初際定哀為末際文宣為中際三九四六分停其運無霸之年諸侯

匆匆如過中之市故五霸者聖人之所寄坊也無五霸則楚狄吳越其橫決固已久矣

戴造云然則五霸何公宋襄固不足道秦穆楚莊居然賢者何以見麾答云秦穆未躬盟會楚莊侵陵上國晉厲驕虐直以三申王命同盟外楚為中原所尊奈何欲以盟主奉楚戴造云晉景晉平實霸中夏奈何亦不見推答云邲之戰實長楚氛鞏之捷有慙王國沙隨平丘直是戰國之事安得與桓文比烈五霸自桓文而後晉厲以功晉悼以德晉襄修其舊業自三公以外無足稱者要以坊德坊淫坊欲則晉悼庶幾諸君未足以語此也

商應椿云右春秋問難皆不專為坊記而發問與表記出入與歷代諸儒言論異別凡三十四條附識於此凡諸同門有所聞志別附於後云



附錄坊記春秋問業